

## Kadyanshi ka Shinga ka Marku

### *Ukukpa u kadyanshi*

Marku, uza da u korongi tagarada u na vi, u reve ta asuki. U rongo ta evu n Bituru cika, a'ayin a ukpa n u'yangā u Yesu. Marku yansa ta nwalu asu asu n Baranaba, uza roku uza da u tsu tono n ama a asuvu a Atoni. A yansa ta manyan kabolo a 'yangasai a'uwa a atoni a asu u da dem a rongoi.

Marku dana ta alabari a Yesu n u ucira. Yesu kotso baci uyan ukunosavu u tsu laza ta ubana a asu u roku u ba u yain kpam u roku de. Marku wenike ta an Yesu yansai ili ushani tsara u banga ama. U wenike tsu ta tyoku da Yesu wari kagbashi. A'ayin a nala yi, ama a rongo ta a uvana uza da wari magono ma ucira a likimba uza da a ka isa Kawauwi. Shegai an Yesu tuwai a wene yi tyoku da a zuwai uma a ka wene Kawauwi wa, kpaci Yesu lya ta tsugono tsu ne n ucira u zuba. Ama roku a kovo ta Yesu, aku a fobusoi tsara a wuna yi. Marku wenike ta tyoku da na vi wari a kapashi ka manyan ma Yesu, nala u yain manyan ma ne ma uwauwa ama.

Tagarada u na wa tonuko ta Atoni a gogo-na u da tsu woko agbashi a atoku; wata, tsu bangamgbana. U wenike ta kpam Yesu pana ta ikyamba adama a da nala Kashila ka ciga yi u gbashika ama. Nala Kashila ka panai kayanyan n ili i'ya Yesu yain, kpam gogo-na wa ta a asu u tsupige a kukere ku ulyaki ku Kashila. Tsu pana baci ikyamba gogo-na adama a uyan ili i

shinga an tsa tono Kashilā, Kashilā ka pana tā dem kayanyan ka tsunu.

*Ili i'ya i'ari a tagarāda u na vi*  
 Akani a Yahaya kalyuḅugi (1:1-8)  
 Ulyuḅugu n ukondo u Yesu (1:9-13)  
 Yesu a Galili (1:14-9:50)  
 Yesu banai a Galili n Urishelima (10:1-52)  
 A'ayin a shindere a makorishi a Yesu: Ukondo n ukpa u ne (11:1-15:47)  
 Yesu wā tā n uma (16:1-8)  
 Yesu wenikei kaci ka ne a asu u atoni a ne (16:9-20)

*Kuḅari ku Yahaya Kalyuḅugi*  
*(Matiyu 3:1-12; Luka 3:1-18; Yahaya 1:19-28)*

<sup>1</sup> Ukuna u Kadyanshi ka Shinga ka Yesu Kirisiti Kawauwi Maku ma Kashilā u da na.

<sup>2</sup> U gitā tā tyoku da wari ukorongu a tagarāda u Ishaya matsumate,  
 “Kashilā ka danai, ‘Ma suku tā katsumate ka va a kapala ka vunu, kotsu u lapuluka vu ure.’” ◇

<sup>3</sup> Uza roku wa salasa a kakamba,  
 ‘Lapulalai ure adama a Asheku, i shamkpa ure vi mai tsara u wala.’ ” ◇

<sup>4</sup> Katsumate ki Yahaya Kalyuḅugi da uza da wa lyuḅugusu ama n mini. Wa rongo a kakamba n u yanyi kuḅari, “Kpatalai i gono a asu u Kashilā, i asaka tsicingi tsu de. A lyuḅugu da, kotsu Kashilā ka cimbusa unyushi u de.”

<sup>5</sup> Kakuma ka ama ushani ka uyamba u Yahuda n aza a Urishelima a wutaḅi a banai ara Yahaya a

dansai unyushi u le, aku u lyuḅugusu le a mini ma Agata a Urudu.

<sup>6</sup> Yahaya u ukai aminya a tsileme tsu karakuma, u sirai kagbawatsu ka ukpan a cuku tsu ne. Kpam ilikulya i ne i'ya abaruma n ishigi.

<sup>7</sup> U tonusukoi ama u danai, “Vuma da wa tuwa a kucina ku va u la mu ta cika. Mpa n ratsa n bana n kuḅangu n surukpa isirikatsu i akpata i a a'ene a ne wa.

<sup>8</sup> Mpa n mini ma n lyuḅugusu da, shegai eyi n Kulu Keri ka wa lyuḅugu da.”

*Ulyuḅugu n ukondo u Yesu*

*(Matiyu 3:13-17; Luka 3:21-22)*

<sup>9</sup> A'ayin a nala yi, Yesu wuta i a Nazara u uyamba u Galili u tuwa ara Yahaya. An u rawai a Agata a Urudu, aku Yahaya lyuḅugu yi.

<sup>10</sup> Yesu n u wuti a asuvu a mini mi, kute-kute u wenei zuba u kukpai, aku Kulu Keri ku cipai ara ne yavu kadya.

<sup>11</sup> Aku a panai kalagatsu a zuba, ka danai, “Ada Maku ma va ma n lai uciga, n avu da ma pana kayanyan cika.”

<sup>12</sup> Kute-kute Kulu Keri ku tonoi n eyi ubana a kakamba,

<sup>13</sup> asu u da u rongoi a'ayin a amangare, Kanan-gasi\* n ka kondusi yi. Nnama n mete n da dem pini asu vi, shegai atsumate a zuba a bana ta n a yanki yi aganda.

*Yesu gitai u'isa atoni a kagita*

*(Matiyu 4:12-22; Luka 4:14-15; Luka 5:1-11)*

---

\* **1:13** Kanangasi; wata, “Shetan” kala ka dem ka Kalapansi.

14 An nala wurai, a kaṅai Yahaya a ukai a kuwa ku a'ali.† Pini nala, Yesu tuwai a Galili wa dansa Kadyanshi ka Shinga ka Kashila.

15 U danai, “A'ayin yi a shadangu de, kpam tsugono tsu Kashila tsu yan de evu. Kpatalai i asaka unyushi u de, aku i wushuku n kadyanshi ka Kashila.”

16 Yesu n u wali a ikengi i Kushiva ku Galili, aku u wenei akani a adan ama a re, Simo n Andurawu uza n uvangu, n a kanaasi adan n ibilili.

17 Yesu tonuko le, “Tono numu, ma wenike da ta tyoku da ya tukuso ama.”

18 Kute-kute a asakai ibilili i le, a tono yi.

19 An u walai kenu, u wenei uza n u vangu; wata, Yakubu n Yahaya mmuku n Zabidi a kpatsu n a lapulusi ibilili i le.

20 Kute-kute u isa le, aku a asakai tata u le n azamaninga, a tono yi.

### *Uza u ityoni i cingi*

*(Matiyu 7:28-29; Luka 4:31-37)*

21 Yesu n atoni a ne a banai a ilyuci i Kafar-nahum. Kain ka Ashibi, u uwai a kagata ka Kashila, aku u gitai uwenishike.

22 Ama a yan ta majiyan, kpaci tyoku u uza u ucira u da wa wenishike le, kpam tyoku u awenishiki a Mele da wari wa.

23 A'ari pini asuvu a kagata ka Kashila ka le ki, aku uza u ityoni i cingi u tuwai wa salasa n ucira,

---

† 1:14 Hiridu Antiba aya magono ma aza a Yahuda a'ayin a da a kaṅai Yahaya a uka yi a kuwa ku a'ali. Aya u zuwai a kaṅa yi.

24 “Ndya va ciga n aṣu, Yesu uza u Nazara? Tuwaḡ ḡa vu tuwai vu wacinsa tsu? N reve ta ko ya vāri, Uza u Uwulukpi u Kashila u ḡa.”

25 Yesu ḡaranai ityoni i cingi yi, u danai, “Paḡa! Vu wuta asuvu a ne.”

26 Ityoni i cingi yi i ḡbaḡa yi n ucira, aku i wurangi yi n ucira i wuta asuvu a vuma vi.

27 ḡba ama a yan ta majiyan, hal a kana uwe-cemgbenishē, “Ndya naha? Uwenishike u savu u ḡa? U ucira? Hal u tsu ḡarana ityoni i cingi kpam i panaka yi!”

28 Kute-kute kadyanshi ka ne ka tamburai ḡba uyamba u Galili.

*Yesu tanasai ama ushani  
(Matiyu 8:14-17; Luka 4:38-41)*

29 Yesu kaḡolo n Yakubu n Yahaya n atoni a ḡa a buwai, a asaḡai kagata ka Kashila ki a laza karara she a kuwa ku an Simo n Andurawu.

30 Mma u uka u Simo wari nvain n usudugbi u ikyamba, an Yesu rawai, kute-kute a laza a tonuko yi ukuna u ne.

31 U banai ara ne u kana yi kukere u 'yangasa yi, aku mḡala mi n asaḡa yi. U gita le upecishike ilikulya.

32 N kuvuli, an kaara ka rukpai, ama a tukoi Yesu ḡba aza a mḡala n aza a ityoni i cingi.

33 ḡba ama a ilyuci yi a ḡolomḡbonoi a utsutsu u kuwa vi.

34 Yesu tanasai aza a mḡala icun kau-kau ushani, kpam u lokoi ityoni i cingi ushani. U asaḡa ityoni i cingi yi i dana ukuna wa, an a revei uza ḡa wari.

*Yesu yain kuɓari a Galili*

*(Luka 4:42-44)*

<sup>35</sup> N kpasani, Yesu 'yaŋgai u aɓakai kuwa ki u wutaɪ a ilyuci yi u banai asu u da bawu ama a'ari, u yain pini kvasu.

<sup>36</sup> Simo n aza da a'ari n eyi a wuta yi ubolo.

<sup>37</sup> An a wene yi a tonuko yi, “Gbā ama da pini a ka bolo vu.”

<sup>38</sup> U wushuki, “Aɓaka tsu banai ilyuci ilyuci i roku i'ya i'ari evu evu, kotsu dem n yanka le kuɓari ki, kpaci ili i'ya i zuwai n tuwai i'ya la vi.”

<sup>39</sup> U tambai a Galili gbā n u yanki le kuɓari a agata a Kashila a le n u wutukpusi ityoni i cingi.

*Yesu taɓasai makutu*

*(Matiyu 8:1-4; Luka 5:12-16)*

<sup>40</sup> Makutu ma roku ma tuwai ara Yesu. U kudangi u folo yi, u danai, “Vu wushuku baci, va fuda ta vu taɓasa mu.”

<sup>41</sup> U pana yi asuvayali, aku u barakpai kukere ku ne u sawa yi. U danai, “N wushuku ta. Taɓa!”

<sup>42</sup> Kute-kute tsukutu tsi tsu aɓaka yi, aku u taɓai.

<sup>43-44</sup> Yesu rono yi atsuvu cika, “Kotsu vu tonuko uza wa, shegai wala ba vu wenike kaci ka vunu a asu u kadarakpi. Vu naka kune ku Musa danai a naka adama a da vu taɓai, kpam kotsu a reve n u da.” ◇ Aku u aɓaka yi u lazai.

<sup>45</sup> Shegai vuma vi u gitai uyan kadyanshi ki, hal u rawai asu u da Yesu kpaɗai u uwa asuvu a ilyuci a kateshe. U ba wa rongo a asu u da bawu uza wari, shegai ko n nala ama a ka wutusā ta a asu kau-kau n a bansi ara ne.

## 2

*Yesu tanasai kawunu*  
(*Matiyu 9:1-8; Luka 5:17-26*)

<sup>1</sup> An a yain a'ayin a kenu, Yesu doku u gonoi a Kafarnahum. Ama a tsarai alabari a da wari a kuwa.

<sup>2</sup> A bolomgbonoi cika hal a nambai kabala a kunu hal kapala ka utsutsu dem. Aku u yanka le kadyanshi.

<sup>3</sup> Ama roku, ama a nishi, a cangai kawunu a tuko yi ara ne. (Uza da bawu wa fuda wa wala ko u gbadā a'ene a ne.)

<sup>4</sup> An a nambai ure u da a ka banka yi ara Yesu adama a kakuma ka ama, a dapai kukpa derere a asu u da wari. Aku a zuralakpai kajiba ka kawunu kari nvain mi.

<sup>5</sup> An Yesu wenei tyoku da a pityanangi n eyi, u tonukoi kawunu ki, “Maku ma va, a cimbusuka vu de unyushi u cingi u vunu.”

<sup>6</sup> Awenishiki a Mele a da a'ari pini ndishi asu vi, a ka yawunsa a atakasuvu a le.

<sup>7</sup> “Ndya i zuwai vuma u na u danai nala? U nusuka ta Kashila. Ya wari n ucira u da wa cimbusa unyushi u cingi bamu n Kashila?”

<sup>8</sup> Kute-kute katakasuvu ka ne ka wenike yi ili i'ya a ka yawunsa a atakasuvu a le i'ya na. U tonuko le, “Ndya i zuwai ya yawunsa nala?”

<sup>9</sup> Ndya i lai shana: Va tonuko kawunu, ‘A cimbusa de unyushi u cingi u vunu.’ Ko gai a dana, ‘Yanga vu shamgba, bidya kajiba ka vunu, vu wala.’?

<sup>10</sup> Adama i reve an Maku ma Vuma† mari n ucira a likimba u da wa cimbusa unyushi u cingi.” U tonukoi kawunu ki,

<sup>11</sup> “N tonuko vu, 'yanga vu shamgba, bidya kajiba ka vunu, vu wala a kuwa.”

<sup>12</sup> U 'yanga u bidyai kajiba ka ne u wuta u lazai a'eshi a le gba. Ya dem yan ta majiyan, aku a cikpalai Kashila, a danai, “Tsu taɓa uwene ukuna naha wa!”

*Yesu isa Levi*

*(Matiyu 9:9-13; Luka 5:27-32)*

<sup>13</sup> U doku u wuta u banai una u kushiva. Kakuma ka ama ka banai ara ne. Aku u gita le uwenishike.

<sup>14</sup> Eyi n u wali, u wenei Levi maku ma Halfa ndishi a kakinda ka uwusha u utafa. Yesu tonuko yi, “Tono mu.” Aku u 'yanga u tono yi.

<sup>15</sup> Pini nala, Yesu tuwai wa lya ilikulya i kuvuli a kuwa ku Levi.† Awushi a utafa† ushani n aza a unyushi u cingi, a ka lya kabolo n eyi, n atoni a ne. Kpaci ama da pini ushani aza da a tono yi.

<sup>16</sup> An awenishiki a Mele n Afarishi a wene yi n u lyayi n aza a unyushi u cingi n awushi a utafa, a wecei atoni a ne, “Ndya i zuwai wa lya n awushi a utafa n aza a unyushi u cingi?”

<sup>17</sup> An Yesu panai nala, u tonuko le, “Aza da a'ari n alafiya a ka ciga uza u aguma wa, she aza a mɓala. N tuwa adama a da ma isa aza a maci wa, she aza a unyushi u cingi.”

*Keci a kaci ka kakuli*

*(Matiyu 9:14-17; Luka 5:33-39)*

<sup>18</sup> Atoni a Yahaya gba n a Afarishi a ka yan kakuli. Ama roku a tuwai a wecei Yesu, “Nida



atoni a Yahaya n atoni a Afarishi a ka yan kakuli, shegai atoni a vunu a ka yan wa?”

<sup>19</sup> U wushuki, “Ya ciga amoci a asu u iyolo a rongo bawu ilikulya? A'a. Wa yan wa! Valisavu wa baci gai n ele a ka yan nala wa.

<sup>20</sup> Kain ka a ka bidya yi a mere ma le ka ta a utuwa, kain ka nala ki ka a ka yan kakuli.

<sup>21</sup> “Vuma wa pada ra kunya ku cau n kakashi ka savu wa. U yan baci nala, kakashi ka savu ki, ka pada ta ka zuwa kunya ku cau ki ku doku ku kara cika.

<sup>22</sup> Kpam vuma wa tsungu mini ma cinwi† ma savu a kadele ka ukpan ka cau wa. Kpaci ma shita baci ma ta sa ta kadele ki, gba kadele ki n mini ma cinwi mi a ka namba le ta. Shegai a tsungu mini ma cinwi ma savu a kadele ka savu.”

*Yesu da Asheku a kain ka Ashibi  
(Matiyu 12:1-8; Luka 6:1-5)*

<sup>23</sup> Kain ka te n kain ka Ashibi, Yesu wa wala a mere ma ashina a ilya. Tyoku da atoni a ne a ka wala n eyi a gitai ukoƙuso aratu a ilya yi n a yuruwi n a takumi.

<sup>24</sup> Afarishi a roku a tonuko yi, “Webele, ndya i zuwai a ka yan ili i'ya i nangasai mele ma tsunu ma Ashibi?”

<sup>25</sup> U wushuki, “I yan kaneshi u ili i'ya Dawuda yain, an eyi n aje a nwalu a ne a nambai, kpam a ka pana kambulu wa?

<sup>26</sup> A'ayin a Abiyata Magono ma Adaraki, Dawuda uwai a Kuwa ku Kashila,† u takumai iburodi i uwulukpi i'ya a nakai Kashila. Ili i'ya

Magono ma Adarākpi ma koshi a wushunki u takuma. Kpam u nākai aje a nwalu a ne i roku.” ◇

<sup>27</sup> Aku u tonuko le, “Kashila ka yan ta Ashibi adama a vuma, shegai vuma adama a Ashibi wa.

<sup>28</sup> Adama a nala, Maku ma Vuma Asheku a da, hal a kain ka Ashibi dem.”

### 3

*Yesu tanasai uza da ili i soi kukere  
(Matiyu 12:9-14; Luka 6:6-11)*

<sup>1</sup> Yesu gonoi a kagata ka Kashila, kpam vuma da ili i soi kukere aya pini a asuvu.

<sup>2</sup> Aza roku a da pini aza da a ka ciga a tsara ili i'ya a ka sapula yi. A zuwuka yi a'eshi a wene ko wa tanasa vuma vi n kain ka Ashibi.

<sup>3</sup> Yesu tonukoi vuma vi, “'Yanga vu wuta na a kateshe.”

<sup>4</sup> Aku u wece le, “Ndya i'ari dere a kain ka Ashibi? Uza u yain ili i shinga ko i cingi? U wauwa uma ko u wuna?” Shegai a paɗai bini.

<sup>5</sup> U lingana le na asuvu a upan, u namgbai asuvu adama a ugbami u asuvu u le. U tonukoi vuma vi, “Raɗagba kukere ku vunu.” An u raɗagbai ka, aku ku tanai.

<sup>6</sup> Pini nala, Afarishi a wutai n ama a Hiridu a ka sheshe tyoku da a ka wuna Yesu.

*Kakuma a unu u Kushiva ku Galili*

<sup>7</sup> Yesu kaɓolo n atoni a ne a asakai ilyuci yi a banai a unu u Kushiva ku Galili. Aku kakuma ka pige ka wutai a kaɓon ka Galili, n uyamba u Yahuda ka tono yi,

<sup>8</sup> n Idumiya n ilyuci i Urishelima, n upashi u Urudu hal n ama a kaɓon ka Taya n Sida. Kakuma ka pige ka tuwai ara ne an a panai ili i'ya wa yansa.

<sup>9</sup> Adama a kakuma ki u zuwai atoni a ne a lapuluka yi kpatsu ku kenu, kotsu kakuma ki ka gbaɓaryangu yi wa.

<sup>10</sup> Kpaci u tanasa ta ama ushani, aku aza a mɓala a ka raɓa evu n eyi, kotsu a tsara a sawa yi.

<sup>11</sup> A'ayin a da baci ityoni i cingi i wene yi she i rukpa iyamba, a kapala ka ne, i sala, "Avu Maku ma Kashila ma."

<sup>12</sup> Shegai she u barana le kotsu a tonuko uza ko ya wari wa.

*Yesu dangasai atoni kupa n ama a re  
(Matiyu 10:1-4; Luka 6:12-16)*

<sup>13</sup> Yesu yuwai a zuba u kagalala, u dangasai aza da eyi wa ciga, a tuwai ara ne.

<sup>14</sup> U dangasai ama kupa n ama a re, u zuwa le a rongo n eyi, kotsu u suku le a wenishike,

<sup>15</sup> kpam a tsara ucira u da a ka wutukpa ityoni i cingi.

<sup>16</sup> Atoni a da u dangasai vi a da: Simo (uza da u nakai kala Bituru),

<sup>17</sup> Yakubu maku ma Zabidi n utoku u ne Yahaya (aza da u nakai kala Buwanaji; wata, mmuku m makpankashila).

<sup>18</sup> U dangasai kpam Andurawu, n Filibu, n Bata-lamawu, n Matiyu, n Toma. U dangasa ta dem Yakubu maku ma Halfa, n Tadawu n Simo Ziloti,

<sup>19</sup> n Yahuza Isikariyoti, uza da u tuwai u neke yi.

*Yesu n Ba'alzabu  
(Matiyu 12:22-32; Luka 11:14-23; Luka 12:10)*

20 Yesu uwai a kuwa, kakuma ka doki ka 6olomgbonoi, hal eyi n atoni a ne a kpaɗai ulya ilikulya.

21 An aza a kuwa a ne a panai nala a banai kotsu a kana yi, an a danai aya pini wa gitā ufulukpa.

22 Aku awenishiki a Mele a ɗa a wutaɗi a Urishe-  
lima a danai, “Wa ta n Ba'alzabu magono mi ityoni  
i cingi, kpam n ucira u ne u ɗa wa wutukpusa  
ityoni i cingi.”

23 Yesu isa le u yain kadyanshi n ele n agisani,  
“Niɗa Kanangasi ka loko Kanangasi?\*

24 Tsugono tsa baci tsu pecei n tsu shilakani, tsa  
tsa fuda tsa shamgba wa.

25 Kuwa ka baci ku pecei n ku shilakani, kuwa  
ku nala ka shamgba wa.

26 Kanangasi ka kovo baci kaci ka ne, aku u pecei  
kure, wa fuda wa shamgba wa, makorishi ma ne  
ma la vi.

27 Uza wa la wa fuda u bana a kuwa ku uza u  
ucira u pura yi ucanga wa, she u gitā u sira yi ve,  
aku u pura yi ucanga vi.

28 “Mayun n tonuko ɗa, gba unyushi u cingi, n  
unyushi u cingi u pige u ɗa ama a ka yansa, a ka  
cimbusuka le ta u ɗa.

29 Shegai uza ɗa baci dem u nusukai Kulu Keri a  
ka taɓa yi ucimbusuka wa, u yan de la vi unyushi  
u ɗa bawu wari n utyoku.”

30 Dana ɗa u danai nala, an a ka dansa, “Wa ta n  
ityoni i cingi.”

*Mma n a'angu a Yesu  
(Matiyu 12:46-50; Luka 8:19-21)*

---

\* 3:23 Kanangasi; wata, “Shetan” kala ka dem ka Kalapansi.

<sup>31</sup> Mma n a'angu a Yesu a rawai. A shamgbai a uwotsu, a suki uza roku a asuvu u isā yi.

<sup>32</sup> Kakum̄a ka ama ka dusuki ka kyawan yi, aku a tonuko yi, “Mma u vunu n a'angu a vunu a dā de a kateshe a ka bolo vu.”

<sup>33</sup> U wecikei, “An ya mma u vā n a'angu a vā?”

<sup>34</sup> Aku u webelei aza dā a dusuki a kyawan yi vi, u danai, “Mma u vā n a'angu a vā a dā na.”

<sup>35</sup> Uza dā baci dem wa yan ili i'ya Kashilā ka ciga aya utoku u vā; vangu n utaku nā mma u vā.

## 4

### *Agisani a uza dā u wacangusi icun (Matiyu 13:1-9; Luka 8:4-8)*

<sup>1</sup> Yesu doku u gitai uwenishike a kaḅon ka kushivā. Kakum̄a ka ka ḅolomgbonoi ka ka kyawan yi ka ka wa wa, hal ka zuwai u uwai a kpatsu u dusuki. Kpatsu ki a ikengi i mini i'ya kari, ama yi tani a shamgbai a kagida.

<sup>2</sup> U wenishike le ili ushani n agisani, u danai,

<sup>3</sup> “Panai. Vuma roku dā u banai uwacangusu u icun.

<sup>4</sup> Tyoku dā wari uwacangusu icun yi, aku i roku i rukpai a ure. Nnu n wutāi n kaḁasāi i'ya.

<sup>5</sup> I roku tani i rukpai a iyamba i atali bawu kayala ka maci. I lazai i binyai adama a unambi u kayala ushani.

<sup>6</sup> An kaara ka yain, ka runukpai i'ya, aku i lazai i ekpei adama a ukpaḁā u'uwa u alu a iyamba.

<sup>7</sup> I roku i rukpai a asu u awana, an i gbonguroi, aku awana yi a sapsai i'ya hal i kpaḁai ilimaci.

<sup>8</sup> I roku tani i rukpai a iyamba i shinga i wutāi, i gbonguroi, i matsai cika. I roku

i'a ta n kamankupa-kamankupa, i roku amangatatsu-amangatatsu, i roku tani amangatawun-amangatawun.”

<sup>9</sup> Yesu korusoi, “Uza da baci wari n atsuvu a upana, u pana.”

*Kalen ka agisani ki*

*(Matiyu 13:10-17; Luka 8:9-10)*

<sup>10</sup> An u wokoi utyoku u ne, ama roku a da a'ari pini a asu vi kaɓolo n atoni a ne Kupanamere,† a wece yi u wutumkpa le agisani yi a kateshe.

<sup>11</sup> U tonuko le, “Ili i'ya a sokongi i tsugono tsu Kashila a wenike da i'ya de. Shegai aza da bawu a'ari a asuvu a de n agisani a da a ka pana ko ndya wa,

<sup>12</sup> adama

‘A uwene n a'eshi a ka wene ta, shegai a ka reve ili i'ya a wenei wa. A upana kpam a ka pana ta, shegai a ka reve wa, ka wa a ka yiralakpa ta Kashila ka cimbusuka le unyushi u le.’ ” ◇

*Yesu wutukpai kalen ka agisani ki*

*(Matiyu 13:18-23; Luka 8:11-15)*

<sup>13</sup> Yesu wece le, “I reve agisani a naha yi wa, nida ya yansa i reve agisani a roku?”

<sup>14</sup> Kacimbi ka nala ki ukuna u Kashila u da u wacangusi.

<sup>15</sup> Ama roku tyoku u icun i'ya i'ari a ure a asu u da a cei ukuna vi da a'ari. N upana u le, aku Kanangasi\* ka bidyai ukuna u da a cei a asuvu a le yi.

◇ **4:12** Isha. 6:9-10.

\* **4:15** Kanangasi; wata, “Shetan” kala ka dem ka Kalapansi.

<sup>16</sup> Aza roku tyoku u icun i'ya i rukpai a asu u atali da a'ari. N upana ukuna vi a wushai u da n ipeli.

<sup>17</sup> Shegai u uwa asuvu a le wa, kpm a barakpa wa. An a'ayin a upana u ikyamba n a mavura adama a ukuna vi a rawai, a laza a rukpai.

<sup>18</sup> Ama roku tani tyoku u icun i'ya a wacangusi asu u awana da a'ari. Ama a na yi alya aza da a panai ukuna vi.

<sup>19</sup> Shegai kadambula ka uma n uciga u udukuyan n maluwa ma ili i'ya i buwai ma gbagbalai ukuna vi a kpadai unaka mmuku.

<sup>20</sup> Aza da a buwai tyoku u icun i'ya a wacangusi a iyamba i shinga da a'ari. A panai ukuna vi, a wushai u da, aku a nakai mmuku. Aza roku a nakai kamankupa kamankupa, aza roku kpm amangatatsu amangatatsu, aza roku tani amangatawun amangatawun.”

*Macikalu ukimbi n kabelu  
(Luka 8:16-18)*

<sup>21</sup> Yesu lyai kapala, u wece le, “Vuma wa la u tabai u sapa macikalu, aku u kimbai ma n kabelu ko u ukai a kere ka ivamkpatsu? A kashamkpatsu ka ne ka wa zuwa ma wa? <sup>22</sup> Ko ndya baci a sokongi a ka wutukpa ta i'ya a kateshe, kpm ko ndya baci a kimbai a ka kukpa ta i'ya.

<sup>23</sup> Adama a nala uza da baci wari n atsuvu a upana, u pana.”

<sup>24</sup> U tonuko le kpm, “Kiranai n ili i'ya i panai. Cifai, kakundatsu ka i kundunki ama ili, ka dem Kashila ka kundunku da ili, hal she u pasaka.

<sup>25</sup> Aza da baci a'ari n ili, alya a ka naka. Aza da baci bawu a'ari n ili, i kenu i'ya a'ari n i'ya vi, a ka wusa le ta i'ya.”

### *Agisani a icun i'ya ya gbonguro*

<sup>26</sup> Yesu lyai kapala u danai, “Naha da tsugono tsu Kashila tsari. Vuma roku da u cei icun a kashina.

<sup>27</sup> U vaki u 'yangai kaara n kayin, gba n nala icun yi i'ari uwuta n i gbonguri, u reve tyoku da ya gbonguro wa.

<sup>28</sup> Iyamba yi n kaci ka ne i zuwai ilya yi i gbonguroi, aku i nakai mmuku. I gitai n asungu, aku aratu aku mmuku pini aratu yi.

<sup>29</sup> An ilya yi i kuwai u kapai i'ya, kpaci a'ayin a ukapa a rawa de.”

### *Agisani a ucun u musta*

*(Matiyu 13:31-34; Luka 13:18-19)*

<sup>30</sup> Yesu wece le, “Ni da tsa dana tsugono tsu Kashila tsari? Agisani a eni a da tsa yan tsu ratsanaka tyoku da tsari?”

<sup>31</sup> Tyoku ucun u musta da tsari, ucun u kenu gbende u da a tsu ce a iyamba.

<sup>32</sup> A ce baci u da u tsu gbonguro ta u lai gba iceshi. U yain nsaɓu n pige n pige a asu u da nnu n tsu rukpa pini a kulu ku ne.”

<sup>33</sup> N agisani ushani icun i na da Yesu tsu tonusuko ama akani a ne tyoku da a ka reve.

<sup>34</sup> U tsu dansa n ele u bawu agisani wa, shegai u woko baci n atoni a ne koshi, aku u wutumkpa le a da a kateshe.

### *Yesu vakunki abali*

*(Matiyu 8:23-27; Luka 8:22-25)*

<sup>35</sup> Kain ki n kuvuli, Yesu n atoni a ne pini a ikengi i Kushiva ku Galili ki, u tonuko le, “Tsu pasamgbantai tsu gonoi upashi u nife.”



<sup>36</sup> Atoni a ne a uwai a kpatsu ku wari, a asakai kakuma ka ama, a lazai n eyi. A'atsu a roku a tonole.

<sup>37</sup> A barakpa wa, uwule u ucira u lapanai, aku abali a ka gbadā kpatsu ki, hal ka ciga ushumbugu.

<sup>38</sup> Yesu wari a kucina ku kpatsu nvain n kaci ka ne a ili i utadanku kaci wa lavuta. Atoni a ne a 'yangasa yi, a danai, "Kawenishiki, tsa shumbugu de, vu dambula wa?"

<sup>39</sup> Yesu 'yangai u baranai uwule vi, "Shamgba!" U tonukoi kpm abali yi, "Shamgba shiriri!" Uwule vi u vaki, aku a asu vi u woko shiriri.

<sup>40</sup> Aku u tonukoi atoni a ne yi, "Ndya i zuwai i giruwai? Hal n ara i pityanangu wa?"

<sup>41</sup> Uwonvo u kana le cika, aku a gitai uwecembene, "Ucun u vuma u eni u da u na vi? Hal uwule n abali dem a ka panaka yi."

## 5

### *Yesu tanasai uza u ityoni i cingi (Matiyu 8:28-34; Luka 8:26-39)*

<sup>1</sup> Yesu n atoni a ne a rawai a upashi u Kushiva ku Galili u uyamba u Garasa.

<sup>2</sup> An Yesu wutai a kpatsu, vuma u ityoni i cingi u wutai a asu u asaun kotsu u cina yi.

<sup>3</sup> Asu u asaun u da u tsu ronguso. Kpm ko uza wa fuda wa sira yi wa, ko n ikani.

<sup>4</sup> Kpaci a so yi ta usirasa akere n a'ene, shegai u kidasai ikani yi u kodusoi irim i'ya i'ari a'ene a ne, kpm ko uza wa n ucira u da wa goso yi wa.

<sup>5</sup> Kaara n kayin nte wa genge pini a asu u asaun vi n kagalala, aku u rongo isali n u kaarasi ikyamba i ne n atali.

<sup>6</sup> Eyi a m̄ari, an u wenei Yesu u sumai u ba u kuḁangi a kapala ka ne.

<sup>7-8</sup> Aku Yesu tonuko yi, “Wut̄ai pini a asu u vuma vi, ityoni i cingi.” Vuma vi u salai cika, “Yesu, Maku ma Kashil̄a ka pige, ndya va ciga n̄a mpa? Tsina n Kashil̄a an va kp̄aḁa mu uyan mavura.”

<sup>9</sup> Pini nala, Yesu wece yi, “Ndyā kala ka vunu?” U danai, “Kala ka v̄a ka Katam, kpaci ts̄a t̄a ushani.”

<sup>10</sup> U foloi Yesu cika kotsu u loko le pini a uyamba vi wa.

<sup>11</sup> Ushiga u mburusunu u ḁa pini wa lina a kagalal̄a ka masasa ma m̄ari evu n a asu vi.

<sup>12</sup> Ityoni i cingi yi i foloi Yesu, “As̄ak̄a tsu tsu bana a asu u mburusunu, kpam vu as̄ak̄a tsu tsu uwa le.”

<sup>13</sup> U wushunku le, aku a wut̄ai a ba a uwai a asuvu a mburusunu. Ushiga vi, evu n̄a mburusunu azu a re (2,000) ḁa. A wuranai she a kushiv̄a a uwai pini a shumbugi.

<sup>14</sup> Aza ḁa a ka lin̄aka mburusunu mi a sumai a ba danai a ilyuci n une. Aku ama a wut̄ai a wene ili i'ya i git̄ai.

<sup>15</sup> An a tuw̄ai ara Yesu a wenei vuma ḁa w̄ari n katam ka ityoni i cingi, ndishi n aminya kpam n ugboji u ne, aku uwonvo u kaṅa le.

<sup>16</sup> Aza ḁa a wenei ukuna vi, a tonukoi ama ili i'ya i git̄ai n vuma ḁa w̄ari n ityoni i cingi n̄a mburusunu mi dem.

<sup>17</sup> Aku a foloi Yesu u as̄ak̄a uyamba vi.

<sup>18</sup> An Yesu wa uwa a kpatsu uza ḁa w̄ari n ityoni i cingi caupa vi u foloi kotsu u toni yi.

<sup>19</sup> Yesu as̄ak̄a yi u toni yi wa, shegai u tonuko yi, “Bana a kuwa asu u ama a vunu vu tonuko le

tyoku da Asheku a yanka vu, n tyoku da u pana vu asuvayali.”

<sup>20</sup> Vuma vi u kyawunsai gba uyamba u Dikafoli, n u tonusuko le ili i'ya Yesu yanka yi. Aza da a panai vi gba a yan ta majiyan.

*Jayiru banai ara Yesu*  
(*Matiyu 9:18-26; Luka 8:40-56*)

<sup>21</sup> An Yesu doki u pasamgbanai a kushiva ki a kpatsu u gonoi upashi u nide, kakuma ka ama ka bolomgbonoi ka kyawan yi eyi pini a asu u kushiva vi.

<sup>22</sup> Uza u te a asuvu a azapige a kagata ka Kashila uza u kala Jayiru u tuwai pini. N u wene Yesu, u kudangi a kapala ka ne.

<sup>23</sup> U folo yi cika u da, “Maku ma va makere ma pini a una u ukpa, kana asuvu vu tuwa vu sawa yi kotsu u tana u yain uma.”

<sup>24</sup> Yesu tono yi, kakuma ka ama ushani ka tono yi n ka gba baryangusu yi.

*Uka u da u sawai Yesu kunya*

<sup>25</sup> Uka da pini uza da wa pana ikyamba cika a asu u ulala u mpasa hal ayen kupa n a re.

<sup>26</sup> U pana ta ikyamba cika a kukere ku aza a aguma kpam u wunai gba ili i'ya wari n i'ya. Da wa yan yi shana, ma bala mi she kapala ka mari ulya.

<sup>27</sup> An u panai ukuna u Yesu, u banai a kucina ku ne a asuvu a kakuma ki, aku u sawa yi kunya.

<sup>28</sup> Kpaci u yawunsa ta a katakasuvu ka ne, “N sawa baci kunya ku ne koshi ma tana ta.”

<sup>29</sup> Kute-kute ulala u mpasa u ne u shamgbai kpam u panai a asuvu a ikyamba i ne u tana, da u wunvugai n upana u ikyamba.

30 Aku Yesu lazai u revei an ucira u wutaì a asuvu a ikyamba i ne. U kpatalai a asuvu a kakumà ki, u danai, “Ya sawai kunya ku va?”

31 Atoni a ne a wushuki, a danai, “Vu wenei dem kakumà ka gbaḅaryangu vu, aku vu dana ya sawa vu?”

32 Shegai Yesu lyai kapala n uweḅelische ko wa wene uza ḁa u yain nala vi.

33 Uka vi an u revei ili i'ya i gitai n eyi, u wutaì u kuḁangi a kapala ka ne, n uwonvo n u jeki ikyamba. Aku u tonuko yi gba ili i'ya i gitai.

34 U tonuko yi, “Maku ma va, upityanangu u vunu u taḅasa vu ḁe. Wala ili vunu, kpam upana u ikyamba u nala vi u pecemgbene n avu.”

*Yesu 'yangasqi maku ma Jayiru a ukpa*

35 An Yesu wari a kadyanshi, ama roku a wutaì a kuwa ku Jayiru, uzapige u kagata ka Kashila. A danai, “Maku ma vunu ma kuwa ḁe. Ugan kpam vu damgbaraḅa kawenishiki ki wa?”

36 Yesu dambula gbam n ili i'ya a ka tono wa, u tonukoi uzapige vi, “Pana uwonvo wa, avu gai pityanangu.”

37 U asaḁa ko uza u toni yi wa, she Bituru, n Yakubu n utoku u ne Yahaya.

38 An a rawai a kuwa ku uzapige ki, Yesu panai ama a'ari kacan, a'ari kushen n isali cika.

39 U uwai a asuvu, u wece le, “Nɔya i tukoi kacan n isali naha? Makere mi ma kuwa wa, alavu a ḁa yi.”

40 Shegai a doso yi idyoshi i magori.

Pini nala, u wutukpa le gba le, u bidyai tata na mma makere vi n atoni a ne a ḁa a'ari n eyi, a uwai ubana a asu u ḁa makere mi mari.

<sup>41</sup> U kaṅai kukere ku makere ki u tonuko yi n kaletsu ka ne, “Talita kumi.” (“Maku ma makere, n da vu 'yaṅa.”) <sup>42</sup> Kute-kute makere mi ma 'yaṅai ma gitai nwalu, kpaci ayen a ne kupa n a re da. N uwene naha aku a yain majiyan cika.

<sup>43</sup> U ɓarana le, kotsu uza u reve ukuna vi wa, aku u tonuko le a nei makere mi ilikulya u lyai.

## 6

### *Unamba u tsupige u matsumate (Matiyu 13:53-58; Luka 4:16-30)*

<sup>1</sup> Yesu n atoni a ne a asaḳai a asu vi a lazai ubana a ilyuci i ne Nazara.

<sup>2</sup> An Ashibi a yain u gitai uwenishike a kagata ka Kashila. Ama ushani a panaka yi aku a yain majiyan. A danai, “Nte vuma u naha tsarai ili i na gba? Ucuu u kakiri ka eni ka a naka yi naha? Webelei ukunosavu† u da a'ari a uyansa a akere a ne!

<sup>3</sup> Kashei ka nala ka naha vi wa, maku ma Meri. Atoku a ne kpam alya an Yakubu, n Isuhu, n Yahuza, n Simo wa? Ataku a ne a da naha kaɓolo n atsu vi wa?” Adama a nala a 'yuwan yi.

<sup>4</sup> U tonuko le, “Matsumate ma tsu namba tsupige wa, she a ilyuci i ne, n asu u ama a ne, n asuvu a kuwa ku ne.”

<sup>5</sup> U fuda u yan ukunosavu wa, shegai u tsarai u sawusai aza a mɓala kenu u tansa le.

<sup>6</sup> U yain majiyan cika, adama a ukpada u up-ityanangu u le.

### *Yesu suki Kupanamere (Matiyu 10:5-15; Luka 9:1-6)*

Yesu kyawain une, n u wenishiki ama.

<sup>7</sup> U isai asuki Kupanamere\* vi u suku le ama a re ama a re, u naḡa le ucira a kaci ka ityoni i cingi.

<sup>8</sup> U tonuko le, “Kotsu i bidya ili adama a nwalu mi wa, she kalangu koshi. Kotsu i bidya ilikulya, ko katsan, ko kpmam ikebe a ijubu i de wa.

<sup>9</sup> I uka akpata a a'ene, shegai kotsu i uka ntogo n re wa.

<sup>10</sup> Kuwa ka baci dem i uwai, rongoi pini she kain ka ya asaḡa ilyuci yi.

<sup>11</sup> Gba ko nte baci a 'yuwan da ko a kpaḡa da upanaḡa, ya wuta baci, i kapaḡsa kabuta ka a'ene a de, adama a iryoci a mere ma le an i wutaḡi uwule u le.”

<sup>12</sup> A wutaḡi a ba a yankai ama kuḡari ki, a kpatala a gono a asu u Kashila a asaḡa tsicingi tsu le.

<sup>13</sup> A wutukpusai ityoni i cingi ushani, a sugburukai aza a mḡala ushani manivi kpmam a tanasa le.

*Ukpa u Yahaya Kalyuḡugi  
(Matiyu 14:1-12; Luka 9:7-9)*

<sup>14</sup> Hiridu magono u panai kadyanshi ka Yesu, kpaci kala ka ne ka tambura ta ko nte wa. Aza roku a ka dansa Yahaya kalyuḡugi aya u 'yangaḡi a ukpa, ili i'ya i zuwai wa yansa ukunosavu da la vi.

<sup>15</sup> Aza roku a danai, “Iliya da.” Aza roku tani a danai, “Matsumate ma yavu ntsumate n cau.”

<sup>16</sup> Shegai an Hiridu panai nala, u danai, “Yahaya vuma da n kidai kaci u 'yanga de a ukpa!”

<sup>17</sup> Kpaci aya u zuwai a kana yi, aku u zuwai a sira yi, a uka yi a kuwa ku a'ali. Yan da u yain nala

---

\* **6:7** A asuvu a atoni a ne gba, aza roku a da pini kupa n ama a re aza da a'ari evu n eyi cika, alya dem u isai “asuki.”

adama a Hiridiya uka u vangu u ne Filibu, u ɗa u zuwai.

<sup>18</sup> An Yahaya tonuko yi, “U gan vu zuwa uka u vangu u vunu wa.”

<sup>19</sup> Hiridiya tani u kaṅai Yahaya a katsuma, hal wa ciga u wuna yi, shegai u reve tyoku ɗa wa yan wa.

<sup>20</sup> Hiridu wa pana ta uwonvo u Yahaya, an u revei vuma u maci ɗa kpam uza u uwulukpi, ɗa i zuwai wa kirana n eyi. U tsu dambula ta cika wa panaka baci Yahaya, shegai ko n nala u tsu ciga ta u panaka yi.

<sup>21</sup> A makorishi, Hiridiya tuwai u gawunkai. An kain ka ilimaci ka Hiridu ka kyawain, u libanai ngono m iyamba, n azapige a asoje, n azapige a Galili abiki yi.

<sup>22</sup> An makere ma Hiridiya ma uwai ma jei, Hiridu n amoci a ne a panai kayanyan. Pini nala, magono ma tonukoi makere mi, “Folo mu gba ili i'ya va ciga, ma naka vu ta i'ya.”

<sup>23</sup> U tsinai u danai, “Ko ndya baci vu wecikei ma naka vu ta, ko kaɓon ka tsugono tsu va tsa baci.”

<sup>24</sup> U wutai u ba u wecei mma u ne, “Ndya ma folo?”

Mma u ne danai, “Kaci ka Yahaya kalyuɓugi.”

<sup>25</sup> Kute-kute u uwai asu u magono n maloko u danai, “Ma ciga ta vu naka mu gogo-na-na kaci ka Yahaya kalyuɓugi a mabaluwa.”

<sup>26</sup> Asuvu a magono a namgbai cika, shegai adama a utsina u ɗa u tsinai a kapala ka amoci a ɗa a'ari pini vi, wa ciga u bishinka yi wa.

27 Kute-kute u zuwai kazoli ka ne ka bana a kuwa ku a'ali u ba u kiɗa kaci ka Yahaya ki. Vuma vi u ba u kiɗa yi kaci ki.

28 U tukoi ka a mabaluwa u naƙai makere mi, makere mi ma bankai mma u ne.

29 An atoni a Yahaya a panai nala, a ba bidyai ikyamba yi a ciɗangi.

*Yesu lyatangi ama azu a tawun*

*(Matiyu 14:13-21; Luka 9:10-17; Yahaya 6:1-14)*

30 Asuki a Yesu yi a gonoi ara ne, a tonuko yi gba ili i'ya a yain n i'ya a wenishikei.

31 An u wokoi ama a yan le ushani, hal Yesu n asuki a ne a tsara kabala ka a ka lya ilikulya wa. Pini nala, u tonuko le, “Tuwai tsu banai a asu u da bawu uza wari tsara i wunvugusa.”

32 Aku a lazai utyoku u le a asuvu a kpatsu ubana a asu u da bawu uza wari.

33 Ama da a wene le n a lazi vi a reve le, aku a wutai gba a ilyuci a walai n ilyadi a lasa le urawa.

34 N ucipa u Yesu a kpatsu u wenei kakuma ka ama, a yanka yi iyali, kpaci tyoku u ncon n da bawu mari n kaliniki da a'ari. U gitale uwenishike ili ushani.

35 An kaara ka yain evu n urukpa, atoni a ne a banai ara ne, a tonuko yi, “Asu u na da na wa n uza wa, kpam kaara ka na ka yan de evu n urukpa.

36 Tutsuku le ubana ashina n une une i'ya i'ari evu evu a ba a tsilaka kaci ka le ilikulya.”

37 U wushunku le, “Eda ne le ilikulya a lyai wawa.”



Aku a tonuko yi, “Ciga da va ciga tsu ba tsu bidya ikebe i manyan ma uwoto kulla† tsu tsilaka ilikulya tsu naka le a lyai?”

38 U wece le, “Iburodi i yain i'ya i'ari n i'ya? Walai i ba i kondo.”

An a ba a kondoi, a danai, “I tawun i'ya n adan a re.”

39 Aku u tonuko le a zuwa ama yi dusukusu abolo abolo a zuba u mete ma taku.

40 Ama yi a dusuki n a tonomgboni, aza roku amangatawun-amangatawun, aza roku amangarenkupa-amangarenkupa.

41 An u bidyai iburodi i tawun n adan a re yi, u gadigbai kaci ka ne a zuba, u cikpai Kashila. Pini nala, u jibamgbanasai i'ya n u naki atoni a ne a nakasa ama, kpmam u pecike le dem adan yi. 42 Gba le a lyai hal a cuwai.

43 Aku atoni yi a cirangi abuwi a iburodi n adan yi hal mbana kupa na n re.

44 Asuvu a ama da a takumai iburodi yi, a'ali ama azu a tawun (5,000) a da.

*Yesu walai a zuba u mini  
(Matiyu 14:22-33; Yahaya 6:15-21)*

45 A barakpa wa, aku Yesu tonukoi atoni a ne a uwa a kpatsu a lasa yi upasamgbana ubana a Besaida, hal n u wacinsi kakuma ki.

46 An u wacinsa le, u banai a masasa kotsu u yain kvasu.

47 An kuvuli ku yain, kpatsu kari a mere ma kushiva, Yesu wari a kagida utyoku u ne.

---

† 6:37 Akorongi a cau a cau a kagita a korongu ta “ikebe i azurufa 200.” Kondo “Ikebe i azurufa” a kaci ka idani ka “Ikebe” a Idani i Ufanga.

48 An u wene le a'ari umodono n uwantika kpatsu, kpaci uwule u 'yangasaka le. N kpasani cika, u tuwai ara le wa wala a zuba u mini ma kushiva. U yain yavu wa wura le.

49 Shegai an a wene yi wa tuwa a zuba u mini, a bidyai ko kafofu ka, a salai.

50 Gba uwonvo u kana le an a wene yi vi.

Kute-kute, u yanka le kadyanshi, u danai, “Gbamai asuvu, ko ili i'a la wa, mpa. Panai uwonvo wa.”

51 Aku u uwai a kpatsu ku a'ari vi, pini nala, uwule vi u vaki. Atoni yi a yan ta majiyan,

52 kpaci a reve kalen ka burodi ki wa, an ataka-suvu a le a gbamai.

*Yesu tanasqi ama a Janisara  
(Matiyu 14:34-36)*

53 An a pasamgbanai a rawai a Janisara, a sirai kpatsu ki a unā u mini.

54 N uwuta u le a kpatsu ama a laza a reve yi.

55 A kotsoi gba kaḅon ki n ilyadi, a cangasai gba aza a mḅala nvain a ajiba a le ubana a asu u ḁa baci dem a panai wari.

56 Gba ko nte baci u banai ilyuci ko a une, she a vakunku aza a mḅala a kuden, aku a folo yi u asaka a sawa ko unā u kunya ku ne. Aza ḁa a sawa yi a tana ta.

## 7

*Agadu a nkoshi n cau  
(Matiyu 15:1-9)*

1 Afarishi n awenishiki a Mele a roku a ḁa a wuta a Urishelima, a ḅolomgbonoi ara Yesu.

<sup>2</sup> A wenei atoni a ne a roku a ka lya ilikulya bawu a sawai akere a le tyoku ḏa u gain.

<sup>3</sup> (Kpaci Afarishi n aza a Yahuda a tsu lya ilikulya bawu a sawai akere a le wa, adama a utono u agadu a nkoshi n cau n le.

<sup>4</sup> A wuta baci a kuden, a tsu lya ilikulya wa, she a bacangusu ve kaci ka le. Agadu a roku a ḏa pini ushani a ḏa a ka kirana n a ḏa, tyoku u uza u nko, na njuju, n adele a irim.)

<sup>5</sup> Afarishi n awenishiki a Mele a wece yi, “Nɔya i zuwai bawu atoni a vunu a ka tono agadu a nkoshi n cau, aku a tsu rongo ulya ilikulya bawu a sawai akere a le tyoku ḏa u gain?”

<sup>6</sup> U wushunku le, “Dere ḏa Ishaya matsumate u danai a kaci ka ḏe, ‘Eḏa aza a maci a kaḃan!’ Tyoku ḏa wari ukorongi, ‘Ama na yi n unā u ḏa a ka naḃa mu tsupige koshi, shegai a atakasuvu a yan ḏe mḃari na mpa.

<sup>7</sup> Ugbashika u ḏa a ka gbashika mu vi u gbani u ḏa, kpaci mele ma a ka wenishike udani u vuma u ḏa.’

” ◇

<sup>8</sup> Yesu danai, “I varangi udani u Kashila, aku ya tono uwenishike u ama.”

<sup>9</sup> Aku u tonuko le, “Mayun, i reve ta uvarangu udani u Kashila adama i toni agadu a ḏe!

<sup>10</sup> Kpaci Musa dana ta, ‘Naḃa tata na mma u vunu tsupige; kpam uza ḏa baci dem u wishai tata u ne ko mma u ne, a ka wuna yi ta.’ ◇

<sup>11</sup> Shegai i tsu wenishike ta ama a ḏe naha, vuma wa fuda ta u bidya ikebe i'ya i gain u baḃga tata

---

◇ 7:7 Isha. 29:13. ◇ 7:10 Uwt. 20:12; U.Ml. 5:16; Uwt. 21:17; Adkp. 20:9.

u ne na mma u ne, aku u tonuko le ikebe i na yi Korba\* da; (wata, kune ubana asu u Kashila).

<sup>12</sup> I buwa yi k<sub>p</sub>am u'asaka u naka tata u ne ko mma u ne ili i roku wa.

<sup>13</sup> N ucun u uwenishike u na vi u da i tsu wuna udani u Kashila. K<sub>p</sub>am ili i'ya pini icun i na yi ushani i'ya i tsu yansa.”

*Ili i'ya i tsu nangasa vuma  
(Matiyu 15:10-20)*

<sup>14</sup> U doku u isaɪ ama, u tonuko le, “Panaka numu gba de k<sub>p</sub>am i reve.

<sup>15</sup> Ili i'a la a kateshe i'ya ya uwa a asuvu a ikyamba i vuma i nangasa yi wa, she ili i'ya ya wuta a asuvu a ne i'ya ya nangasa yi.

<sup>16</sup> [Uza da baci wari n atsuvu a upana, u pana.]”†

<sup>17</sup> An u pecenei n kabolo ki, u uwai a kuwa. Atoni a ne a wece yi kalen ka agisani ki.

<sup>18</sup> U tonuko le, “I'a n ubidya u ukuna wa? Ili i'a la a kateshe ya uwa vuma i nangasa yi wa vi.

<sup>19</sup> K<sub>p</sub>aci i bana a asuvu a katakasuvu ka ne wa, shegai a katsuma ka i banai, aku i wuta yi.” Nala Yesu gonukoi gba ilikulya i woko ili i ulya.

<sup>20</sup> U danai k<sub>p</sub>am, “Ili i'ya i tsu wuta a katakasuvu ka uza i'ya i tsu nangasa yi.

<sup>21</sup> K<sub>p</sub>aci a katakasuvu ka ukuna u cingi u tsu wuta, tyoku uyawunsa u cingi, n tsishankala, n

---

\* **7:11** Korba agadu a da a da ama a tsu wenike ikebe i le i ushani tyoku u kune adama a manyan ma Kashila. Nala zuwa le ta a wokoi faa a asu u manyan ma le ma uyanka ikebe i le manyan a kirana na nkoshi n le; shegai a una u da a ka naka i'ya Kashila, aku a gonoi a zuwai i'ya adama a manyan ma kaci ma le. † **7:16** Akorongi a cau ushani aza da a purai a tagarada u Marku a kalatsa ta makpanda ma 16.

uboki. Ka tsu tuko ta dem ukuna u mawunuka, na nvain n aka kabarikete.

<sup>22</sup> Kurura n tsicingi dem nte a tsu wuta pini. Katakasuvu ka tsu zuwa ta dem ulapanasa n ukuna u cingi. Malyon dem n kunangasu, n aradi n utengeshi a tsu wuta dem pini.

<sup>23</sup> Gba ili i cingi i na yi asuvu a da i tsu wuta, kpam i tsu nangasa ta vuma.”

*Upityanangu u uka da wari Kawulawa  
(Matiyu 15:21-28)*

<sup>24</sup> Pini nala, Yesu 'yangai u banai evu n Taya n Sida. U uwai a kuwa ku roku, kpam wa ciga ko uza u reve wa, shegai wari ukpawan wa.

<sup>25</sup> Kute-kute uka roku, uza da makere ma ne mari n ityoni i cingi, u panai ukuna u ne, u tuwai u kudangi a kapala ka ne. <sup>26</sup> Uka vi Kawulawa† ka, kagali ka ne kpam Kasurofiniki ka. U foloi Yesu wutukpa maku ma ne mi ityoni yi.

<sup>27</sup> Yesu tonuko yi, “Asaka ve mmuku n cuwa. Kpaci ugan a varanku nshe ilikulya yi mmuku wa.”

<sup>28</sup> Shegai u wushunki yi, “Eye nala Asheku, shegai nshe n tsu lya ta agashi a mmuku.”

<sup>29</sup> Aku u tonuko yi, “Adama a kadyanshi ka vunu, gono a kuwa. Ityoni yi i pecembene de n maku ma vunu.”

<sup>30</sup> U gono i kuwa u cinai maku mi nvain. Ityoni yi i wuta de a asuvu a ne mayun.

*Yesu tanasai kabebe*

<sup>31</sup> Yesu asakai kaƙon ka Taya, u tonoi a ilyuci i Sida u banai a Kushiva ku Galili ku uyamba u Dikafoli.

<sup>32</sup> Ama roku a tuko yi kabebe kpam kagulani ka dem, aku a folo yi u tadanku yi akere.

<sup>33</sup> U bidya yi a banai kapashi ka te dangi n kakumā ki, aku u ukai ajubu a ne a atsuvu a vuma yi, u cikpai atatsa, aku u sawai kpam kaletsu ka vuma ki.

<sup>34</sup> U gadigbai kaci ka ne a zuba, u tsukpai kuvi ku pige, aku u tonukoi vuma vi, “Ifata!” (Wata, “Kukpa!”)

<sup>35</sup> Kute-kute atsuvu a ne a kukpai, a surukpa yi ili i'ya i sira yi kaletsu, u kanai kadyanshi mai.

<sup>36</sup> Aku Yesu barana le kotsu a tonuko uza ukuna vi wa, shegai ubarana vi u wokoi yavu kakana da u kakana le a ba a dansa kadyanshi ki.

<sup>37</sup> Gbā aza da a panai nala, a yain majiyan cika. A danai, “Ko ndya wa u yan ta i'ya mai! Hal n kagulani ka u zuwai ka panai, kabebe kpam ka yain kadyanshi.”

## 8

### *Yesu lyatangi ama azu a nishi (Matiyu 15:32-39)*

<sup>1</sup> A'ayin a nala yi, an kakumā ka doki ka bolomgbonoi, a'a tani n ilikulya wa. Aku Yesu isai atoni a ne, u tonuko le,

<sup>2</sup> “Ma pana ta asuvayali i kakumā ka na ki, kpaci a'ayin a le a tatsu a da pa vi kabolo na mpa bawu ilikulya.

<sup>3</sup> N wacinsa le baci a gono a kuwa n kambulu, a ka kpāda ta a ure, aza roku tani a mbari n da a wutai.”

<sup>4</sup> Aku atoni a ne a danai, “Nte vuma wa tsara ilikulya i'ya wa lyatangu ama a na a kakamba ka na?”

<sup>5</sup> U wece le, “Iburodi i yain i'ya i'ari n i'ya?”

A danai, “I shindere i'ya.”

<sup>6</sup> Aku u zuwai kakuma ki ka dusuki a iyamba. An u bidyai iburodi yi, u cikpai Kashila, u jibamgbanasai n u nakasi atoni a ne a bansaka le, a bansaka le tani.

<sup>7</sup> A'a ta tani n adan a shawu kenu. An u cikpai Kashila, u zuwai a bansaka le a da dem.

<sup>8</sup> A lyai, a cuwai hal atoni yi a purai abuwu a iburodi yi mbana n shindere.

<sup>9</sup> Ama yi tani a ka rawa ta evu n azu a nishi. Aku u wacinsa le.

<sup>10</sup> Kute-kute u uwai a kpatsu n atoni a ne a banai uyamba u Dalmanuta.

### *Afarishi a wecikei iryoci*

*(Matiyu 16:1-4; Luka 12:54-56)*

<sup>11</sup> Afarishi a tuwai a gitai uwecishe Yesu kotsu a kondo yi, a da u wenike le iryoci i zuba.

<sup>12</sup> U tsukpai kuvi ku pige, u danai, “Ndy a i zuwai ama a gogo-na a lai uciga uwene iryoci? N tonuko da, iryoci i'a la a ka wenike ama a gogo-na wa.”

<sup>13</sup> Pini nala, u doku u uwai a kpatsu u pasai upashi u nide u asaka le.

### *Kiranai n yisti u Afarishi*

*(Matiyu 16:5-12)*

<sup>14</sup> Atoni a Yesu a ci6a a bidya burodi wa, she u te u da a'ari n u da a kpatsu ki.

<sup>15</sup> U rono le atsuvu u danai, “I kirana n yisti u Afarishi n u Hiridu.”

16 A yamgbanai kadyanshi utyoku u le, “An bawu tsari n burodi da u zuwai u danai nala.”

17 An Yesu revei nala aku u tonuko le, “Nɗya i zuwai i'ari a kadyanshi i'ari n burodi wa? Dana hal n ara i wene wa, kpam i reve wa? Atakasuvu a de ugbami u de da a'ari?”

18 Eɗa la n a'eshi, ya wene wa da? I'a ta n atsuvu, ya pana wa da? Kpam i tsu ciɓa wa da?

19 An n jibamgbanasakai ama azu a tawun iburodi i tawun, mbana n yain n da i cirangi tipi tipi n abuwu a iburodi?”

A danai, “Kupa na n re.”

20 “Iburodi i shindere i'ya tani n jibamgbanasakai ama azu a nishi tani, mbana tipi tipi n yain n da i tashi n abuwu a iburodi?”

A danai, “N shindere.”

21 Aku u wece le, “Hal n gogo-na i reve wa da?”

### *Utanasu u karumba a Besaida*

22 A rawai a ilyuci i Besaida. Ama roku a tukoi Yesu karumba, a folo yi u sawa yi.

23 U kanai kukere ku karumba ki, u banka yi a uroto u ilyuci. U cikpai atatsa a a'eshi a karumba yi, u taɗanki yi akere, aku u wece yi, “Fuɗa vu wene ili?”

24 Karumba ki ka gaɗigbai kaci u danai, “Ma wundya ta ama, shegai tyoku u ndanga u da ma wundya le a ka tamba.”

25 Aku u doki u taɗanki yi akere a a'eshi a ne. A'eshi yi a kukpai u tanai, u wenei ko ndya wa mai.

26 Yesu tonuko yi, “Wala vu gono a kuwa, kotsu vu uwa a une wa.”



*Kadyanshi ka Bituru a kaci ka Yesu  
(Matiyu 16:13-20; Luka 9:18-21)*

27 Yesu n atoni a ne a 'yàngai a uwusai a une une u ilyuci i Kasariya Filibi. A ure u wecei atoni a ne, “Ya ama a ka dansa mari?”

28 A tonuko yi, “Aza roku a danai aɗa Yahaya Kalyuɓugi, aza roku tani Iliya, aza roku tani, uza roku asuvu ntsumate.”

29 Aku u wece le, “Eɗa tani ya ya dansa mari?”

Bituru wushunki yi, “Avu Kawauwi ka.”

30 Aku u rono le atsuvu kotsu a tonuko uza ukuna u ne wa.

*Yesu danai tyoku da wa kuwa  
(Matiyu 16:21-28; Luka 9:22-27)*

31 Yesu gita le uwenishike, “U kana ta Maku ma Vuma ma pana ikyamba cika. Nkoshi n aɗaraki a pige n awenishiki a Mele a 'yuwan yi, hal a wuna yi. A'ayin a tatsu a wura baci, aku u 'yanga n uma.”

32 U danai kadyanshi ka nala tani a kateshe. Aku Bituru rono yi a ikengi, u gita yi ubara.

33 Shegai an Yesu kondonoi u wenei atoni a ne, u gitai ubara Bituru, “Yan mɓari na mpa, Kanan-gasi!\* Vu yan ukuna u Kashila wa, she u ama.”

34 U isaɓi kakuma ki kaɓolo n atoni a ne, u danai, “Gba uza da baci wa ciga u tono mu she u 'yuwan kaci ka ne, u canga mawandambani ma ne u tono mu.

35 Gba uza da baci dem wa kirana n uma u ne, wa namba ta u da. Uza da tani baci u nambai uma u ne adama a Kadyanshi ka Shinga ka va, wa wauwa ta u da.

---

\* **8:33** Kanangasi; wata, “Shetan” kala ka dem ka Kalapansi.

<sup>36</sup> Nte kalen ka vuma wa tsarā likimba gba, aku u namba uma u ne?

<sup>37</sup> Ndyā kpmam vuma wa fudā wa naḳa a unā u uma u ne?

<sup>38</sup> Ama a gogo-na aza a unyushi u cingi a ḁa aza ḁa kpatalakai Kashilā kucina. Adama a nala, uza ḁa baci dem wa pana uwono u ḁa wa yan kadyanshi ka va a'ayin a na, Maku ma Vuma ma pana ta uwono u ne a'ayin a ḁa baci ma tuwa n tsupige tsu Tata n tsu atsumate a eri.”

## 9

<sup>1</sup> Aku u tonuko le, “Mayun n tonuko ḁa, aza roku a ḁa pini kushani asu naha vi, a ka kuwa wa, she a wene utuwa u tsugono tsu Kashilā n ucira.”

### *Uyansaka u Yesu*

*(Matiyu 17:1-13; Luka 9:28-36)*

<sup>2</sup> An a'ayin a teli a wurai, Yesu bidyai Bituru, n Yakubu, n Yahaya, kabolo n eyi a banai a masasa ma roku ma ugadi, utyoku u le. Aku u yansakai a kapala ka le.

<sup>3</sup> Aminya a ne a waramai pun a ka laḁa, kazai ka la a likimba ka ka fudā ka zuwa a woko nala wa.

<sup>4</sup> Aku atoni a ne ama a tatsu yi a wenei Musa n Iliya a tuwai ara Yesu a ka yanka yi kadyanshi.

<sup>5</sup> Bituru kukpai unā u tonukoi Yesu, “Kawenishiki, u lobono ta tsari pini na. Asaka tsu yain atani a tatsu, ka te ka vunu, ka te ka Musa ka te kpmam ka Iliya.”

<sup>6</sup> Uwonvo u ḁa u kana le cika, ḁa u nambai ili i'ya wa dana.

<sup>7</sup> Aku kalishi ka roku ka wutai ka kimba le. A panai kpmam kalagatsu ka wutai pini a kalishi ki ka

danai, “Maku ma v̄a ma na vi, uza d̄a ma ciga cika, pan̄aka ni.”

<sup>8</sup> Kute-kute a webelei n maloko, a doku a wene kpm uza wa, Yesu d̄a a wenei koshi kaḅolo n ele.

<sup>9</sup> A'āri ugidaḷa a masasa mi, aku Yesu rono le atsvu u danai, “Kotsu i tonuko uza ili i'ya i wenei vi wa, she a'ayin a d̄a mpa Maku ma Vuma n 'yangāi a ukpā.”

<sup>10</sup> A aṣakāi ukuna vi a atakasuvu a le, a ka wecembene kalen ka u'yangā a ukpā.

<sup>11</sup> A wece yi, “Ndy a i zuwai awenishiki a Mele a danai Iliya d̄a wa gitā utuwā?”

<sup>12</sup> Aku u tonuko le, “Mayun d̄a Iliya wa gitā utuwā u lapula ili. Ko n nala ndya i zuwai kadyan-shi ka Kashilā ka danai, Maku ma Vuma ma pana tā ikyamba cika, aku a 'yuwan yi?

<sup>13</sup> N tonuko d̄a, Iliya tuwā de, kpm a yanka yi de gbā ili i'ya i yan le tyoku d̄a u luwa le, tyoku d̄a wāri ukorongi a tagarāda u Kashilā.”

*A t̄anasai maku uza u ityoni i cingi i tsubebe  
(Matiyu 17:14-21; Luka 9:37-43)*

<sup>14</sup> An a gonoi a asu u atoni a Yesu a d̄a buwai vi, a wenei kakumā ka pige ka kyawan le. Awenishiki a Mele a'āri kananamgbani n ele.

<sup>15</sup> N uwene Yesu, kakumā ki gbā ka yain majiyan cika, a ḅosoi n ilyadi she ara ne, a danaṣa yi.

<sup>16</sup> U wece le, “Kananamgbani ka iyen ka i'āri a uyan n ele?”

<sup>17</sup> Aku vuma roku a asuvu a kakumā ki u wushunki yi, “Kawenishiki, maku ma v̄a ma n tuko vu, kpaci wā tā n ityoni i cingi i tsubebe.

18 A'ayin a ɗa baci dem i yuwa yi she i varangi yi a iyamba, unā u ne u rongo kapufu, n u gbori a'anga a ne. Kpam she ugbama ko nte wa. N foloi atoni a vunu a wutukpa yi i'ya, shegai a kpaɗai.”

19 U wushunku le, “Eɗa nida ukpaɗa u up-ityanangu u de wari! Hal ubana nwere ɗa ma dusuku n aɗa kahu i wushuku? Kpam hal ubana nwere ɗa ma fuda n kawunku n aɗa? Tuko numu n eyi.”

20 A tuko yi maku mi.

An ityoni i cingi yi i wene yi, kute-kute i gbashangi maku mi, ikyamba i ne n i jeyi, u rukpai u rongoi uganda, unā u ne wari kapufu.

21 Yesu wecei tata u maku vi, “A'ayin a eni a ɗa ili yi i gita yi?”

U danai, “Tun eyi kenu.

22 I so yi ta uvarangusu a asuvu akina n mini kotsu i wuna yi. Shegai va fuda baci, pana asuvay-ali a tsunu vu banga tsu.”

23 Yesu tonuko yi, “Vu da ma fuda baci? Uza ɗa baci dem u wushuki, a ka yanka yi ta ko ndya wa.”

24 Kute-kute tata u maku vi u 'yangasai kalagatsu, u danai, “N wushuku ta. Banga mu n ukpaɗa u uwushuku u va.”

25 An Yesu wenei kakuma ki kari utuwa n ilyadi a asu vi, u baranai ityoni i cingi yi u tonuko yi, “Avu ityoni i cingi i tsubebe, n tonuko vu pecemgbene n eyi, kotsu vu doku vu uwa yi wa.”

26 Aku ityoni yi i salai, i gbashangi maku mi cika, ikyamba i ne ya je, pini nala i pecemgbenei n eyi. Maku mi ma wokoi yavu kakushe, hal gbam ama ushani a danai, “U kuwa de.”

27 Shegai Yesu kanai kukere ku ne u 'yangasa yi, u 'yangai tani n kushani.

28 An Yesu tuwai u uwai a kuwa, atoni a ne a wece yi ukpawunsi, “Ndyā i zuwai atsu tsu kpaɗai i'ya uwutukpa?”

29 Aku u tonuko le, “Ucun u nala u tsu wuta wa, she n kvasu.”

*Yesu doku u danai ukuna u ukpa u ne  
(Matiyu 17:22-23; Luka 9:43-45)*

30 Pini nala, Yesu n atoni a ne a 'yangai a bātsamgbana i uyamba u Galili, wa ciga tani uza u reve wa.

31 Kpaci atoni a ne a ɗa wa wenishike, wa tonusuko le, “A ka neke ta Maku ma Vuma akere a ama a wuna yi. A wuna yi baci, a'ayin a tatsu a wurai, wa 'yanga ta.”

32 Shegai a reve ili i'ya kadyanshi ki ka tono wa, kpam a panai uwonvo u ɗa a ka wece yi.

*Ya lai tsupige?  
(Matiyu 18:1-5; Luka 9:46-48)*

33 A tuwai a Kafarnahum. An u uwai a kuwa, u wece le, “Kananamgbani ka iyen ka i'ari uyan a ure?”

34 A paɗai bini, kpaci a ure vi a nanamgbana ta ko ya uzapige u le.

35 Aku u dusuki u isa i Kupanamere vi, u tonuko le, “Uza ɗa baci dem wa ciga u woko uza u kapala, u kana ta she u woko uza u makorishi a asuvu a ama gba. Kpam u gbashika ko ya wa.”

36 Aku u bidyai maku ma kenu u zuwa yi a mere ma le, u wofo yi u tonuko le,

37 “Uza ɗa baci dem u wushai maku ma kenu ucun u na adama a kala ka va, mpa u wushai. Uza

da kpam u wusha mu, mpa koshi u wushai wa, hal n uza da suku mu da u wushai.”

*Ukpada u tsilala n Yesu  
(Luka 9:49-50)*

<sup>38</sup> Aku Yahaya tonuko yi, “Kawenishiki, tsu wene ta vuma roku wa wutukpusa ityoni i cingi n kala ka vunu, aku tsu bishinka yi kpaci wa a asuvu a tsunu wa.”

<sup>39</sup> Shegai Yesu danai, “Bishinka ni wa. Vuma wa la wa yan ukunosavu n kala ka va, aku u laza kute-kute u dana ukuna u gbani kaci ka va wa.

<sup>40</sup> “Gbā uza da baci dem bawu wa yan tsilala n atsu, uza u tsunu u da.

<sup>41</sup> Uza da baci dem u ne da mini ma uso a mako adama a da i'ari aza a Kawauwi, n tonuko da, maken ma la wa, wa kpada utsara katsupi ka malen ma manyan ma ne wa.

*Panai uwonvo u uyan unyushi  
(Matiyu 18:6-9; Luka 17:1-2)*

<sup>42</sup> Yesu lyai kapala n kadyanshi, “Da vuma roku wa zuwa maku ma te a asuvu a mmuku n kenu n na aza da a pityanangi na mpa u nusa, wa laka ta a siraka yi katali ka kira ka pige a udyoku u ne, a varangi yi a asuvu a kushiva.

<sup>43</sup> Kukere ku vunu ka zuwusa vu baci unyushi, kida ka. Wa laka vu ta shana vu tsara uma n kukere ku te, n u da va uwa akina n akere a re, akina a da bawu a'ari ucimba.

<sup>44</sup> [Asu u azun a da a ka takuma a da bawu a ka kuwa, kpam a ka cimbusa akina yi wa.]

<sup>45</sup> Kune ku vunu ka zuwusa vu baci unyushi, kida ka. Wa laka vu ta shana vu tsara uma n kune

ku te, n u ɗa a ka varangu vu akina n a'ene a vunu a re.

<sup>46</sup> [Asu u azun a ɗa a ka takuma a ɗa bawu a ka kuwa, kpam a ka cimbusa akina yi wa.]

<sup>47</sup> Keshi ka vunu ka zuwusa vu baci unyushi, fodo ka. Wa laka vu ta vu uwa a tsugono tsu Kashila n keshi ka te, n u ɗa a ka varangu vu akina n a'eshi a re.

<sup>48</sup> Asu u azun a ɗa a ka takuma a ɗa bawu a ka kuwa, kpam a ka cimbusa akina yi wa.

<sup>49</sup> “N akina a ɗa a ka wulukpe ya dem, tyoku ɗa a tsu wulukpe uɗaraka na mkpadi.

<sup>50</sup> “Mkpadi ili i'ya i shinga, shegai n namgba baci bawu n yankpai kpam, n iyen i'ya a ka yankpusa n ɗa?

“I rongo tyoku u mkpadi a asuvu a ɗe, i dusuku ndishi n shinga n atoku a ɗe.”

## 10

### *Uwenishike u Yesu a kaci ka upece u iyolo (Matiyu 19:1-12; Luka 16:18)*

<sup>1</sup> Yesu 'yangai pini a asu vi, u banai a ubongu u Yahuda a upashi u Agata a Urudu. Aku kakuma ka ama ka doki ka bolomgbonoi a asu u ne, u wenishike le tyoku ɗa u cuwanakai.

<sup>2</sup> Afarishi a roku a tuwai ara ne a ka ciga a wandi yi, a wece yi, “U gan vuma u asaka uka u ne?”

<sup>3</sup> U wushunku le, “Nɗya Musa tonuko da i yain?”

<sup>4</sup> A danai, “Musa wushuku ta vali wa fuda ta u korongu tagarada u upece iyolo u asaka uka u ne.”

◇

<sup>5</sup> Yesu wushunku le, “Adama a uryagbaji u ɗe ɗa i zuwai Musa koronku da mele ma nala mi.

6 Shegai a kagita Kashila ka yan le ta vali n uka.

◇

7 Adama a nala, vali u asaka tata u ne na mma u ne, u padara n uka u ne.

8 Kpam ama a re a le gba a woko ikyamba i te. A buwa kpam ama a re wa, shegai uza u te. ◇

9 Adama a nala ili i'ya baci Kashila ka gawain, kotsu vuma u peci i'ya wa.”

10 An a gonoi a kuwa, atoni a ne a doku a wece yi ukuna u nala vi.

11 U wushunku le, “Uza da baci dem u asakai uka u ne u zuwai u roku, tsishankala tsa wa yan n eyi.

12 Uka u asaka baci tani vali u ne, aku u banai uza roku iyolo, tsishankala tsa dem wa yan.”

*Yesu na mmuku n kenu*

*(Matiyu 19:13-15; Luka 18:15-17)*

13 Ama a ka tukuso mmuku n kenu ara Yesu kotsu u sawa le, aku atoni a ne a barana le.

14 An Yesu wenei nala, u panai upan. U tonuko le, “Asakai mmuku n kenu-kenu n tuwa ara va, fishinka le wa, kpaci tsugono tsu Kashila tsu icun i le tsa.

15 Mayun n tonuko da, uza da baci dem bawu u wushai tsugono tsu Kashila tyoku da maku ma kenu ma tsu yan, wa u'uwa tsa wa.”

16 Aku u wofuso le u tafanku le akere, u zuwusuka le unā u shinga.

*Kalobo ka utsari*

*(Matiyu 19:16-30; Luka 18:18-30)*

17 Gita da u gitai nwalu, aku vuma roku u wu-ranai n ilyadi, u kudangi a kapala ka ne u danai,

◇ 10:6 Kag. 1:27; Kag. 5:2; Kag. 12:36; Ishp. 110:1. ◇ 10:8 Kag. 2:24.



“Kawenishiki ka shinga, ndya ma yan n tsarā uma u ḍa bawu wari n utyoku?”

<sup>18</sup> Yesu wece yi, “Ndyā i zuwai vu isā mu uza u shinga? Uza u shinga wā la wa, she Kashilā koshi.

<sup>19</sup> Vu reve tā gai mele mi. Kotsu vu wuna uma u vuma gbani wa. Kotsu vu vaku n uka ḍa bawu wari u vunu wa. Kotsu vu boko wa. Kotsu vu sirāka kaḅan kaḅetsu wa. Kotsu vu ryafa uza wa. Vu naḅa tata nā mma u vunu tsupige.” ◇

<sup>20</sup> U danai, “Kawenishiki, tun mpa kenu ḍa ma tonu ili i nala yi.”

<sup>21</sup> Yesu weḅele yi n a'eshi a uciga, u danai, “Ili i te i'ya i buwa vu koshi, ba vu denge gbā ili i'ya wari n i'ya, vu ḅangā aza a unambi, tsarā vu yain n utsari a zuba. Aku vu tuwā vu tonu mu.”

<sup>22</sup> N upana kadyanshi ka nala ki, katakasuvu ka ne ka rukpai, aku u lazai n unamgbi u asuvu, kpaci wā tā n utsari cika.

<sup>23</sup> Yesu weḅelei atoni a ne, u tonuko le, “U wuyana tani n ni, uza u utsari u uwa tsugono tsu Kashilā?”

<sup>24</sup> Atoni a ne yi a yain majiyan ma kadyanshi ka ne. Aku Yesu doku u tonuko le, “Mmuku n vā, u wuyana tani n ni uza u utsari u uwa tsugono tsu Kashilā?”

<sup>25</sup> Wa la tā shana karakuma ka wura a kpele ka kujulu n u ḍa uza u utsari wa uwa a tsugono tsu Kashilā.”

<sup>26</sup> Atoni yi a lapulai a yain majiyan cika, aku a ka wecemgbene, “Nala baci ya wā la vi wa tsarā iwauwi?”

---

◇ 10:19 Uwt. 20:12-16; U.Ml. 5:16-20.

<sup>27</sup> U wundyana le, u danai, “A asu u ama ili i uyan i'ya wa, shegai a asu u Kashila ili dem i uyan i'ya.”

<sup>28</sup> Bituru tonuko yi, “Atsu wa tani na, aza da tsu asakai gba ili i tsunu tsu tonu vu?”

<sup>29-30</sup> U wushuki, “Mayun n tonuko da, uza da baci dem u asakai kuwa n kashina ka ne adama a va n kadyanshi ka va, wa wusha ta ili i'ya i lai i'ya u asakai vi kakuma a'ayin a gogo-na. Wa tsa ta a'uwa amangatawun (100), hal n ashina dem kabolo n mavura. Nala kpam dem uza da baci u asakai atoku n amaku na mma n tata na mmuku n ne adama a va, wa tsa ta amangatawun u atoku n amaku na mma n tata na mmuku kabolo n mavura. Kpam a'ayin a da a ka tuwa wa tsa ta uma u da bawu wari n utyoku.

<sup>31</sup> Shegai aza da a'ari a kapala ushani a ka woko ta makorishi, aza a makorishi tani a kapala.”

*Yesu doku u danai tyoku da wa kuwa  
(Matiyu 20:17-19; Luka 18:31-34)*

<sup>32</sup> Yesu n atoni a ne a lyai kelime na nwalu ubana a Urishelima, kpam aya a kapala. Atoni yi a yain majiyan, aza da a ka tonu yi kpam a panai uwonvo. U doku u purai Kupanamere vi paki, u tonuko le ili i'ya ya ba i rukpa a kaci ka ne.

<sup>33</sup> U danai, “Atsa na tsa bana a Urishelima. A ka neke ta Maku ma Vuma a akere adarakpi a pige n awenishiki a Mele. A ka kidaga yi ta ugana u ukpa, aku a neke yi a akere a Awulawa.

<sup>34</sup> A ka yanka yi ta majari, a cikpunka yi atatsa, a bawan yi, aku a wuna yi. A'ayin a tatsu a wura baci, aku u 'yanga.”

*Ufolu u Yakubu n Yahaya  
(Matiyu 20:20-28)*

<sup>35</sup> Aku Yakubu n Yahaya mmuku n Zabidi a tuwaj ara Yesu, a danai, “Kawenishiki, tsa ciga ta vu yanka tsu ukuna u roku tsu folo vu baci.”

<sup>36</sup> U wece le, “Ndya ya ciga n yanka da?”

<sup>37</sup> A wushuki, “Kain ka va dusuku a tsugono tsu pige tsu vunu, asaka uza u te u tsunu u dusuku a ulyaki u vunu, uza u ire tani a ugula.”

<sup>38</sup> U danai, “I reve ili i'ya ya folo vi wa. Ya fuda ya so mako ma upana ikyamba tyoku da mpa ma tuwa n soi ko a lyubugu da tyoku da a ka lyubugu mu?”

<sup>39</sup> A danai, “Tsa fuda ta.”

U tonuko le, “Ya fuda ta ya so mako ma upana ikyamba tyoku da ma so, a lyubugu da tyoku da a ka lyubugu mu.

<sup>40</sup> Shegai ndishi a ulyaki ko a ugula u va, mpa ma naka wa. U aza da Kashila ka fobusukoi u da.”

<sup>41</sup> An atoni a ne kupa da a buwai a panai nala, a gitai upana upan u Yakubu n Yahaya.

<sup>42</sup> Yesu isa le gba a asu u te, u danai, “Aza da a revei n tsugono tsu Awulawa, a tsu wenike le ta ucira, kpm ngono n pige n tsu wenike le ta ucira cika.

<sup>43</sup> Shegai ara de nala wa, uza da baci dem wa ciga u woko uzapige a mere ma de, u kana ta u woko kagbashi ka de.

<sup>44</sup> Kpm ko ya baci wa ciga u woko a kapala, u kana ta u woko kagbashi ka ama gba.

<sup>45</sup> Kpaci Maku ma Vuma ma tuwa adama a da a ka gbashika yi wa, shegai u gbasha, u naka kpm uma u ne katsupi adama a ama ushani.”

*Batimawu karumba u wenei*  
(*Matiyu 20:29-34; Luka 18:35-43*)

<sup>46</sup> Yesu n atoni a ne a rawai a ilyuci i Jeriko kaɓolo n kakuma ka ama ushani. An a ka wuta a ilyuci yi, karumba ka roku ndishi a ikengi i ure wa folo. Kala ka ne ka Batimawu maku ma Timawu.

<sup>47</sup> An u panai Yesu uza u Nazara da, u gitai isali, “Yesu, maku ma Dawuda, pana asuvayali a va!”

<sup>48</sup> Ama ushani a barana yi a tonuko yi u pada, shegai u lapulai u salai cika, “Maku ma Dawuda, pana asuvayali a va!”

<sup>49</sup> Yesu shamgbai, u danai, “Isa ni.” Aku a ba a isa yi, a tonuko yi, “Pana kayanyan! 'Yanga! Wa isa vu.”

<sup>50</sup> Aku u varangi kunya ku uwambana ku ne, u 'yangai n ucira she ara Yesu.

<sup>51</sup> Yesu wece yi, “Ndya va ciga n yanka vu?”

U danai, “Kawenishiki, ma ciga n wene asu.”

<sup>52</sup> Yesu danai, “Wala, upityanangu u vunu u tansa vu de.”

Kute-kute u lazai u wenei asu, aku u tonoi Yesu a lazai.

## 11

*Aza Urishelima a ryabusai Yesu*

(*Matiyu 21:1-11; Luka 19:28-40; Yahaya 12:12-19*)

<sup>1</sup> An Yesu n atoni a ne a yain evu n Urishelima, n Betafaji, n Batani a asu u Masasa ma Zayitum, u suki atoni a ne a re.

<sup>2</sup> U tonuko le, “Uwai a une u da wari a kapala ka de nala vi, n u'uwa u de ya wene ta maku

ma makparyagi ma bawu a taƙai uyuwā usiri. I surukpa ma i tuko.

<sup>3</sup> Uza ɗa baci dem u wece ɗa ili i'ya i zuwai ya tatsukpa ma, i tonuko yi, 'Asheku a ɗa a ka ciga ma, kpam wa gonuko ta ma gogo-na.' ”

<sup>4</sup> Aku a lazai a ba a cinai maku ma makparyagi mi usiri a uwotsu u kuwa evu n ure. An a ka surukpa ma,

<sup>5</sup> ama ɗa a'ari pini kushani a asu vi a wece le, “Nɗya i zuwai ya surukpa ma?”

<sup>6</sup> A wushunku le tyoku ɗa Yesu tonuko le, aku ama yi a aƙa le a lazai.

<sup>7</sup> An a tuko yi maku ma makparyagi mi, a polusoi aminya a upalaka a le a zuba u ne, aku u yuwai.

<sup>8</sup> Ama ushani a polusoi aminya a upalaka a le a ure, aza roku tani a polusoi avuku a ɗa a sataasai a agbaji.

<sup>9</sup> Aza a kapala n aza a kucina a rongoi isali n a dansi, “Hosana,\* cikpalai Kashila! Kashila ka zuwuka uza ɗa u tuwai n kala ka Magono ma Zuba unā u shinga! ◇

<sup>10</sup> Kashila ka zuwuka tsugono tsu tata u tsunu Dawuda tsa tsa tuwa na vi unā u shinga! Hosana, cikpalai Kashila!”

<sup>11</sup> Aku u uwai a Urishelima u uwai a Kuwa ku Kashila. An u webelishi ko ndya wa, u wenei kaara ka kotsoi, aku u wutai u banai a Batani kaɓolo n Kupanamere vi.

---

\* **11:9** “Hosana” idyani i'ya ama a tsu danasa uzapige i'ya tsara a naka yi tsupige. Kalen ka ne ka, “Kashila ka wauwa yi!” ko kpam “A cikpala yi.” ◇ **11:9** Ishp. 118:25-26.

*Yesu yankai madanga ma kapopi una  
(Matiyu 21:18-19)*

<sup>12</sup> An kain ka wansai, a asakai Batani, Yesu panai kambulu.

<sup>13</sup> An u wenei madanga ma kapopi ma mari n avuku a mbari, u ba u webelei ko ma matsa. An u rawai a asu vi, u wene ili wa she avuku, kpaci a'ayin a ilimaci a kapopi a da wa.

<sup>14</sup> Aku u tonukoi kapopi ki, “Uza wa doku wa lya kpam ilimaci i kapopi ara vunu wa.” Kpam atoni a ne a panaka yi ta u danai nala.

*Yesu lokoi aza a tsilaga a Kuwa ku Kashila  
(Matiyu 21:12-17; Luka 19:45-48; Yahaya 2:13-22)*

<sup>15</sup> N urawa a Urishelima, Yesu uwai a Kuwa ku Kashila, aku u gitai uloko aza da a ka tsila n a dengi pini. U mutsukpusai iteburu i aza a usavadaasa ikebe n ikirika i adengi ntambara.

<sup>16</sup> Kpam u asaka uza da u cangai ili i roku u wura pini a ulanga u Kuwa ku Kashila ki wa.

<sup>17</sup> Aku u wenishike le u danai, “A korongu wa, a da ‘A ka isa kuwa ku va kuwa ku kavasu ka ama a iyamba gba wa.’? ◇ Shegai eda i gonukoi ka kaaɓuru ka aza a magalaka.”

<sup>18</sup> An adarakpi a pige n awenishiki a Mele a panai, a gitai ubolo ure u da a ka wuna yi, kpaci a ka pana ta uwonvo u ne an ama gba a yain majiyan n uwenishike u ne.

<sup>19</sup> An kuvuli ku yain, aku a asakai ilyuci yi.

*Uwenishike a kaci ka u'ekpe u kapopi  
(Matiyu 21:20-22)*

◇ 11:17 Isha. 56:7; Iri. 7:11.

<sup>20</sup> An a ka wura n usana, aku a wenei maɗanga mi ma ekpei hal n alu.

<sup>21</sup> Bituru cibai, aku u tonukoi Yesu, “Kawenishiki, webele, maɗanga ma vu yankai unā vi ma ekpe de.”

<sup>22</sup> U wushunku le, “Pityanangi n Kashila.

<sup>23</sup> Mayun n tonuko da, vuma da baci dem u tonukoi masasa ma na, ‘Muda ba vu rukpa a kushiva,’ kpm bawu u yain malala a katakasuvu ka ne, shegai u pityanangi ili i'ya u danai, a ka yanka yi ta i'ya.

<sup>24</sup> Adama a nala n tonuko da, ili i'ya baci dem i foloi n kvasu, wushuki i tsara i'ya de, kpm ya woko ta i de.

<sup>25</sup> A'ayin a da baci dem i shamgbai uyan kvasu, i'a baci n uza da ya pana upan, cimbusuka ni. Tata u de uza da wari a zuba wa cimbusuka da ta dem unyushi u cingi u de.

<sup>26</sup> [Shegai i cimbusuka baci ama wa, nala dem Tata u de uza da wari a zuba wa cimbusuka da unyushi u cingi u de wa.]”

*Keci a kaci ka ucira u Yesu  
(Matiyu 21:23-27; Luka 20:1-8)*

<sup>27</sup> A doki a gonoi a Urishelima, tyoku da Yesu wari nwalu a asuvu a Kuwa ku Kashila, adarakpi a pige n awenishiki a Mele na nkoshi n pige a tuwai ara ne.

<sup>28</sup> A wece yi, “N ucira u eni u da va yansa ili i naha gba? Kpm ya naka vu ucira u da va yansa i'ya?”

<sup>29</sup> U wushunku le, “Ma yan da ta dem keci. I wushunku mu baci, mpa dem ma tonuko da ta ucira u da ma yansa ka ili i na yi.

<sup>30</sup> Tonuko numu: Ucira u ulyuḅugusu u Yahaya a zuba ḁa u wutaḱ ko a asu u ama?”

<sup>31</sup> A dansai utyoku u le a danai, “Tsu dana baci a zuba ḁa u wutaḱ, wa dana taḅ ndya i ḅishinka tsu uwushuku n eyi?”

<sup>32</sup> Kpam tsu dana baci a asu u ama ḁa u wutaḱ, kakumaḅ ka na ka pana taḅ upan u tsunu.” A panai uwonvo u kakumaḅ ki, kpaci ya dem u bidya taḅ Yahaya matsumate ma.

<sup>33</sup> Aku a wushunki yi a danai, “Tsu reve wa.”

Aku u tonuko le, “Mpa dem ma tonuko ḁa ko ucira u eni u ḁa ma yansaḁa ili i na yi wa.”

## 12

### *Agisani a azamaninga a cingi* (*Matiyu 21:33-46; Luka 20:9-19*)

<sup>1</sup> Yesu gitaḅ le uyanka kadyanshi n agisani u danai, “Vuma roku u ḁa u yain kashina ka cinwi, u kanzai ka u gavaḱ kadakaḅ ka ukpokuso ilimaci i cinwi yi. U mai kpam kunukuzuba ku uza u uwundya kashina ki. Aku u naḁaḱ acimbi a roku haya u lazai nwalu.

<sup>2</sup> An a'ayin a uta a yain, u suki kagbashi ka ne ka te a asu u aza a haya yi u wushika yi a asuvu ucanga u kashina vi.

<sup>3</sup> Acimbi yi a kaḅaḅ yi a lapai, aku a loko yi akere a de.

<sup>4</sup> Aku u doku u sukunku le kagbashi ka roku, eyi kpam a gbasha yi a kaci, a yanka yi uwono.

<sup>5</sup> U doki u suki kpam uza roku, eyi tani a wuna yi. Nala u sukusi ama ushani, a lapusai aza roku, aza roku tani a wunusa le.



6 U buwai n uza u te, maku ma ne ma wa ciga cika. A makorishi u suki yi, u danai, ‘A ka wene ta karinga ka maku ma va!’

7 Shegai aza a haya yi a sheshei utyoku u le, ‘Maku ma kagita ma ne ma gai pa vi. Tuwai tsu wuna ni, tsara agadu yi a woko a tsunu.’

8 Aku a kana yi a wunai, a varangi yi a uroto u kashina vi.

9 “Ndya uza u kashina vi wa yan? Wa tuwa ta u wuna aza a haya yi, u naka ka aza roku.

10 I ta ba uyan kaneshi a tagarada u Kashila naha wa?

‘Katali ka aza a kuma a 'yuwain, ka ka lakai kalen cika a asu u kuma.

11 Manyan ma Asheku ma la vi, ara tsunu tani ili i majiyan i'ya.’ ” ♦

12 Azapige a aza a Yahuda yi a bolo ta kotsu a kana yi, kpaci a reve ta a kaci ka le ka u yain agisani yi. Shegai a ka pana ta uwonvo u ama, adama a nala a asaka yi u lazai.

*Utsupa u utafa ara Kaisa Magono  
(Matiyu 22:15-22; Luka 20:20-26)*

13 An nala wurai, azapige a aza a Yahuda yi a sukunki Yesu Afarishi a roku n ama a Hiridu a wandi yi n keci.

14 An a rawai ara ne, a tonuko yi, “Kawenishiki, tsu reve ta vu tsu dansa ta ukuna u mayun, k pam ya dem unu u te da vu bidya yi. A'ayin a da dem va wenishike ukuna u Kashila, vu tsu dansa ta ukuna u mayun, vu tsu dambula n ukuna u da azapige a tsu dansa a kaci ka vunu wa. Tonuko tsu, ugan tsu tsupa Kaisa magono utafa?”

♦ 12:11 Ishp. 118:22-23.

15 Tsu tsupa ko tsu kpaḍa utsupa?

Eyi tani an u revei wanda ḍa a ka wanda yi, u tonuko le, “Nḍya i zuwai ya kondo mu? Tuko numu ukebe u azurufa\* n wene.”

16 A tuko yi. Aku u wece le, “Kulu n kala ka yai ka kari pini a ukebe vi?”

A danai, “Ku Kaisa ka.”

17 Aku u tonuko le, “Naḱai Kaisa ili i'ya i'ari i Kaisa; Kashila kḗam i naḱa yi ili i'ya i'ari i Kashila.”

A yain majiyan cika.

*Keci a kaci ka u'yangā u ukpa  
(Matiyu 22:23-33; Luka 20:27-40)*

18 Aku aza a Sadusiḥ (aza ḍa bawu a wushuki n u'yangā u ukpa) a tuwai ara Yesu, a wece yi,

19 “Kawenishiki, Musa koronku tsu ta a kaci ka tsirana. U da uza u kuwa baci u asaḱai uka bawu mmuku, u kana ta utoku u ne u sotuku uka vi u matsaka yi mmuku.

20 A yan ta a'ali a roku ama a shindere, uza n utoku u ne. Uza u kagita u zuwai uka, u kuwai u asaḱa maku wa.

21 Uza u ire (uza ḍa u tonu yi) u sotuki marana mi, eyi dem u kuwai u asaḱa maku wa. Nala dem n uza u tatsu.

22 Gba le gai uza wa la u asaḱai maku wa. A makorishi uka vi dem u kuwai.

23 Kain ka u'yangā a ukpa, uka u yai u ḍa wa woko, cinda gba le a zuwusa yi?”

---

\* 12:15 Kondo “Ikebe i azurufa” a kaci ka idani ka “Ikebe” a Idani i Uḅanga.

24 Yesu wushuki, “An bawu i revei Tagarada u Kashila,† kpm i reve ucira u Kashila wa, da i zuwai i puwain.

25 Kpaci a 'yanga baci a ukpa a ka yan iyolo wa, kpm a ka wutukpa iyolo wa. Shegai tyoku u atsumate a zuba a da a ka woko.

26 A ukuna u u'yanga u akushe, i ta6a ukaneshi a tagarada Musa a asu u alabari a maku ma madanga ma ma tasa akina wa, an Kashila ka danai, 'Mpa Kashila ka Ibirahi, Kashila ka Ishaku, n Kashila ka Yakubu?' ◇

27 Eyi Kashila ka akushe ka wa, shegai ka aza a uma. Mayun da i puwain.”

*Mele ma ma lai ugbonguro*

*(Matiyu 22:34-40; Luka 10:25-28)*

28 Aku kawenishiki ka Mele ka roku ka tuwai ka panaka le a'ari kananamgbani. An u wenei Yesu wushunku le mai, aku u wece yi, “Gba a asuvu a mele, ma eni ma ma lai ugbonguro?”

29 U wushunku yi, “Ma ma lai ugbonguro ma, 'Panai, aza a Isara'ila! Magono ma Zuba Kashila ka tsunu, aya koshi Magono ma Zuba.

30 Ciga Magono ma Zuba Kashila ka vunu n katakasuvu ka vunu n uma u vunu gba. Vu cigi yi kpm n kakiri ka vunu n ucira u vunu gba.' ◇

31 Ma ma tono yi tani ma, 'Ciga uza u karen u vunu tyoku da va ciga kaci ka vunu.' ◇ Mele ma roku ma la ma ma lai ma nala mi wa.”

32 Aku kawenishiki ka Mele ka danai, “Mayun da vu, Kashila ka te ka, uza roku wa tani la wa, she eyi. ◇

◇ 12:26 Uwt. 3:6. ◇ 12:30 U.Ml. 6:4-5. ◇ 12:31 Adkp. 19:18.

◇ 12:32 U.Ml. 4:35.

<sup>33</sup> A cigi yi gbà n katakasuvu, gbà n kakiri, gbà n ucira. Kpam vu cigi uza u karen u vununu tyoko òa va ciga kaci ka vununu, ili i na yi i la tã uðaraḱpa u urunukpa n ukidãsa a m̄b̄ari.” ◊

<sup>34</sup> An Yesu wenei u wushunki yi mai, u tonuko yi, “Vã m̄b̄ari n tsugono tsu Kashilã wa.”

Pini nala, uza u doku kawan kpam u wece yi wa.

*Keci a kaci ka maku ma Dawuda  
(Matiyu 22:41-46; Luka 20:41-44)*

<sup>35</sup> An Yesu wa wenishike a Kuwa ku Kashilã, u wecikei, “Nidã awenishiki a Mele a ka dana Kirisiti Kawauwi maku ma Dawuda magono ma?”

<sup>36</sup> Kulu Keri ku zuwai Dawuda danai, ‘Magono ma Zuba ma tonukoi Asheku a vã, dusuku a ulyaki u vã, hal she n taðangu vu a zuba u atokulalu a vununu.’ ◊

<sup>37</sup> “Dawuda n kaci ka ne u isã baci Kawauwi Asheku, nidã wa yansa u woko maku ma Dawuda?” Kakumã ka panãka yi n ipeli.

*Yesu toðugboi awenishiki a Mele  
(Matiyu 23:1-36; Luka 20:45-47)*

<sup>38</sup> Tyoku òa wa wenishike le, u danai, “Kiranai n awenishiki a Mele aza òa a ka ciga kutambu n aminya a pige. A tsu la tã uciga a danãsa le a kuden n tsupige.

<sup>39</sup> Kpam a lai n uciga a asu u ndishi u òa u lai tsulobo a agata a Kashilã, n a asu u shinga a asu u abiki.

<sup>40</sup> Shegai a tsu lyasa tã ucanga u nrãna, a rongo kpam uyansa kavasu ka ugadi adama a ukimbusã

u a'eshi. Icun i ama a nala a ka yan le ta mavura cika.”

*Kune ku maraṅa*  
(Luka 21:1-4)

<sup>41</sup> Yesu dusuki evu a asu u uzuwusa u ikebe u Kuwa ku Kashila, wa wundya tyoku da ama a ka zuwusa ikebe a asu u uzuwusa u ikebe vi. Aza a utsari ushani a tsungi pini ikebe ushani.

<sup>42</sup> Aku maraṅa ma roku uza u unambi u tuwa u zuwai irim i re i kenu.† <sup>43</sup> Aku u isaṅi atoni a ne u tonuko le, “Mayun n tonuko da, maraṅa ma nala ma la ta gba aza da a zuwai ikebe i le a asu u uzuwusa u ikebe u nala vi.

<sup>44</sup> Kpaci ele a asuvu a utsari u le u da a zuwusai, shegai eyi asuvu a unambi u ne u da u bidyai gba, u zuwai ikebe i ulyaka ilikulya i ne.”

## 13

*Kadyanshi ka uwasu u Kuwa ku Kashila*  
(Matiyu 24:1-2; Luka 21:5-6)

<sup>1</sup> N uwuta u Yesu a Kuwa ku Kashila, katonni ka ne ka te ka tonuko yi, “Kawenishiki, kondo ve icun i atali a nala yi! N icun i kuma ku nala ki!”

<sup>2</sup> Yesu wushunki yi, “Vu wene kuma ku pige ku nala? Katali ka la ka a ka asaka utadangi a zuba u utoku u ne bawu a wasai ka wa.”

*Kagita ka upana u ikyamba*  
(Matiyu 24:3-14; Luka 21:7-19)

<sup>3</sup> Tyoku da Yesu wari ndishi a Masasa ma Zayitum ma ma wundyamgbana n Kuwa ku Kashila,

---

† 12:42 Kondo “Irim i kenu” a kaci ka idani ka “Ikebe” a Idani i U6anga.

Bituru n Yakubu n Yahaya n Andurawu a wece yi a ikengi,

<sup>4</sup> “Tonuko tsu, nwere da a ka yan ili i nala yi? Kpam icun i iryoci i eni i'ya a ka wene ya ciga baci i gita?”

<sup>5</sup> U tonuko le, “Kiranai kotsu uza roku u puwunsa da wa.

<sup>6</sup> Ama ushani a ka tuwa ta n kala ka va, a dana alya Kirisiti Kawauwi, hal a puwunsa ama ushani.

<sup>7</sup> I pana baci ukuna u kuvon n alabari a kuvon, kotsu asuvu a de a 'yanga wa. U kana ta u gita nala, shegai makorishi ma kotsu wa.

<sup>8</sup> Kaletsu ka ama ka 'yanga<sup>saka</sup> ta kaletsu ka ama roku. Tsugono kpam tsu 'yanga<sup>saka</sup> tsugono. Iyamba ya gba<sup>da</sup> ta a asu kau-kau, kpam a ka yan ta kambulu. Shegai gba nala vi kagita ka upana u ikyamba ka ve.

<sup>9</sup> “Shegai eda she i kirana. A ka kana da ta a banka a asu u Asheshi a Pige, a bawan da a asuvu a agata a Kashila. A neke da akere a aza a tsugono na ngono adama a kala ka va, an i tonuko le ukuna u va.

<sup>10</sup> Shegai kahu makorishi ma tuwa, she a yanka aletsu a ama gba Kadyanshi ka Shinga ka va.

<sup>11</sup> A'ayin a da baci dem a banka da a asu u afada a neke da, kotsu i dambula a ili i'ya ya dana wa. Shegai gba ili i'ya baci dem a naka da i'ya ya dana. Kpaci eda ya dansa wa, Kulu Keri ka.

<sup>12</sup> Vuma wa neke ta utoku u ne a wuna yi, tata kpam dem nala wa yanka maku ma ne. Mmuku kpam n 'yanga<sup>saka</sup> isheku i le hal a zuwa a wuna le.

<sup>13</sup> Ama gba a ka 'yuwan da ta adama a kala ka va. Shegai gba uza da baci dem u kawunki hal ubana a makorishi, a ka wauwa yi ta.

*Upana u ikyamba u pige  
(Matiyu 24:15-28; Luka 21:20-24)*

<sup>14</sup> “A'ayin a'a ta a utuwa, ada ya wene ili i icadi i shamgba a asu u da bawu i gain i shamgba.” (Uza da wa yan kaneshi, u reve ili i'ya asu u na wa tonol!) “Aza da a'ari a uyamba u Yahuda she a bana a nsasa.

<sup>15</sup> Uza da baci dem wari a zuba u kukpa ku kunu ku ne, kotsu u cipa u uwa a kuwa u bidya ili i roku wa.

<sup>16</sup> Uza da wari a kashina, kotsu u gono a ilyuci u bidya kunya ku upalaka ku ne wa.

<sup>17</sup> Ter de aka a atsuma n aza a mmuku n shili a a'ayin a nala yi!

<sup>18</sup> Yanyi kvasu kotsu ukuna u nala vi u gitā n ilyushi wa.

<sup>19</sup> A'ayin a nala yi a ka yan ta upana u ikyamba u pige, u da bawu a tabai uyan tun a'ayin a da Kashila ka yain likimba hal utuwa ara. A ka doku a ka yan a da kpam wa hal ubana a makorishi.

<sup>20</sup> U woko baci Magono ma Zuba ma jebel a'ayin yi wa, uma wa la wari wa la wa. Shegai adama a aza da a dangasai vi da i zuwai u jebel a'ayin yi.

<sup>21</sup> “A'ayin a nala yi ko ya baci tonuko da webelei Kawauwi ka na, ko webelei aya de! Kotsu i wushuku wa.

<sup>22</sup> Kpaci awauwi a ka ban na nsumate n ka ban a ka tuwa ta a yain iryoci n ikunesavu kotsu a puwunsa aza da a dangasai, wa yan baci.

<sup>23</sup> Kiranai, kpaci n tonuko dā tā ko ndya wa gampā.

*Utuwa u Maku ma Vuma  
(Matiyu 24:29-31; Luka 21:25-28)*

<sup>24</sup> “Shegai a'ayin a upana u ikyamba a nala a wura baci, kaara ka limanā tā, uwoto tani wa nākā katyashi wa.

<sup>25</sup> Atala a ka rukpusā tā, kpam a gbādā ili i pige i pige i'ya i'ari a zuba.

<sup>26</sup> A'ayin a nala a dā a ka wene Maku ma Vuma ma tuwā a asuvu a alishi, n ucira u pige u tsugono.

<sup>27</sup> Aku u suku atsumate a zuba a bolomgbono aza dā a dangasai a aḅon a nishi a likimba; wata, ili i'ya i bidyai a mḅari n likimba n naha ubana a utyoku u zuba u nide.

*Udani a kaci ka madanga ma kapopi  
(Matiyu 24:32-35; Luka 21:29-33)*

<sup>28</sup> “Rotsongusi a iryoci i madanga ma kapopi. A'ayin a dā baci i wenei atyangi a ne a limanāi, aku a gitai utopo avuku, i reve tā an ilyushi i yain evu.

<sup>29</sup> Nala kpam dem a'ayin a dā baci dem i wenei ili i nala yi ya gitasa, ya reve tā an a'ayin a yain evu n uyan.

<sup>30</sup> Mayun n tonuko dā, ama a gogo-na a ka kotso wa, she a shadangu ili i na yi gbā.

<sup>31</sup> Zuba n likimba wa cimba tā, shegai kadyanshi ka vā ka cimba wa.

*Kain ka ugono u Kawauwi  
(Matiyu 24:36-44; Luka 17:26-30, 6)*



<sup>32</sup> “Shegai ukuna u kain ka nala ki ko ulapa u uwule vi, uza wā la u revei ka wa. Atsumate a zuba ko Maku, a reve ka wa. Tata ḍa koshi u revei ka.

<sup>33</sup> Kiranai i rongo n afoḍi n i yanyi kavasū. Kpaci i reve a'ayin a ḍa ulapa u uwule vi wa yan wa.

<sup>34</sup> “Utuwā u Maku ma Vuma wā t̄ tyoku u vuma ḍa u yain nwalu, u aṣankāi agbashi a ne manyan ma ya dem wa yan, aku u tonukoi uza u uwundya u utsutsu u rongo n afoḍi.

<sup>35</sup> Rongoi n afoḍi, kpaci i reve kain ka uza u kuwa wa gono wa, wa fuda t̄ u gono n kuvuli, ko a mere ma kayin, ko n kpasani, ko n usana.

<sup>36</sup> Kotsu u tuwā u danda ḍa n i lavuti wa.

<sup>37</sup> Ili i'ya n tonuko ḍa kpam ma tonuko ya dem i'ya, i rongo n afoḍi.”

## 14

*A boloi ure u ḍa a ka wuna Yesu  
(Matiyu 26:1-5; Luka 22:1-2; Yahaya 11:45-53)*

<sup>1</sup> A'ayin a re a ḍa a wokoi, a yain Abiki a Up-samgbana n Abiki a Ilikulya i'ya i Nambai Yisti. Aku aḍar̄kpi a pige n awenishiki a Mele a boloi ure u ḍa a ka kaṇa Yesu usokongi kotsu a wuna.

<sup>2</sup> A danai, “Shegai tsa kawan tsa yan u ḍa a a'ayin a abiki a na wa, kawa ama a ka 'yangaṣaka tsu t̄.”

*A tsunki Yesu manivi ma magulani  
(Matiyu 26:6-13; Yahaya 12:1-8)*

<sup>3</sup> A'ari pini Yesu wari a Batani a kuwa ku Simo uza ḍa caupa wari makutu. Eyi pini n u lyayi ilikulya, uka roku u tuwāi n majuju ma manivi.

Manivi mi ma magula<sup>n</sup>i\* ma kpam ma ta n ikebe cika. U kukpai unā u majuju mi, u tsala<sup>i</sup> manivi mi gba a kaci ka Yesu.

<sup>4</sup> Ama roku a da a'ari pini a asu vi a panai upan. A yangbanai kadyanshi, “Ndyā kalen ka koli ka manivi naha?”

<sup>5</sup> Ma ratsa ta a denge ma ikebe i'ya i lai i'ya uza wa yan manyan ma uwoto kupa n u re,<sup>†</sup> aku a pecike aza a unambi.” A kana<sup>n</sup> yi uyanka tsali n asuvu a shen.

<sup>6</sup> Shegai Yesu danai, “Asaka<sup>n</sup> ni shiriri! Ndyā i zuwai ya damgbara<sup>n</sup> ya? Ili i shinga i pige i'ya u yanka mu.

<sup>7</sup> Kain dem i'a ta kabolo n aza a unambi, kain ka baci dem, ya ciga ya fuda ta i yanka le ili i shinga. Shegai mpa ma kabolo n ada<sup>n</sup> kain dem wa.

<sup>8</sup> Eyi gbam u daraka ta hal u tsunki ikyamba i va n manivi kahu kacida<sup>n</sup> ka va.

<sup>9</sup> Mayun n tonuko da, gba ko nte baci a ka yan Kadyanshi ka Shinga a likimba, she a yan kadyanshi ka ili i shinga i'ya uka u naha vi u yain, kpam a ka rongo yi ta ucibusu.”

*Yahuza Isikariyoti u wushuki u neke Yesu  
(Matiyu 26:14-16; Luka 22:3-6)*

<sup>10</sup> Yahuza Isikariyoti uza u te a asuvu Kupanamere yi, u banai a asu u adarakpi a pige kotsu u neke Yesu ara le.

---

\* **14:3** A yan ta majuju mi n katali ka a ka isa alabasta. Manivi mi kpam a yan ta ma n ili i'ya a ka isa nara<sup>n</sup>di. † **14:5** Akorongi a cau a cau a kagita a korongu ta “ikebe i azurufa 300.” Kondo “Ikebe i azurufa” a kaci ka idani ka “Ikebe” a Idani i U6anga.

<sup>11</sup> An a panai nala a yain mazanga hal a zuwamgbanai a ka naka yi ikebe. Eyi tani u gitai uzama tyoku da wa yan u neke yi.

*Yesu lyai ilikulya i Abiki a Upasamgbana  
(Matiyu 26:17-25; Luka 22:7-14; Luka 22:21-23;  
Yahaya 13:21-30)*

<sup>12</sup> Kain ka kagita ka Abiki a Ilikulya i'ya i Nam-bai Yisti, kain ka a cuwanakai ukidasa mmuku ma a'ondom, kain ka Abiki a Upasamgbana ka la vi. Atoni a ne a wece yi, "Nte va ciga tsu ba tsu fobusuko vu a asu u da va lya ilikulya i Abiki a Upasamgbana?"

<sup>13</sup> Aku u suki atoni a ne a re. U tonuko le, "Uwai a ilyuci, ya bana ta i gawunsa n vuma roku u cangai malanda ma mini, i toni yi,

<sup>14</sup> kuwa ka baci dem u uwai, i tonuko uzakuwa vi, kawenishiki ka danai, nte kunu ka wa lya ilikulya i Abiki a Upasamgbana n atoni a ne kari?

<sup>15</sup> Wa wenike da ta kunukuzuba ka a fobusoi ucanga, nte ya fobusuko tsu pini."

<sup>16</sup> Atoni yi a 'yangai a uwai a ilyuci. A cinai tani tyoku da u tonuko le. Aku a fobusoi Abiki a Upasamgbana.

<sup>17</sup> An kuvuli ku yain, aku u tuwai kabolo n Kupanamere vi.

<sup>18</sup> A'ari ulya ilikulya, Yesu danai, "Mayun n tonuko da, vuma u te a asuvu a de wa neke mu ta, k pam uza da tsa lya kabolo n eyi."

<sup>19</sup> A namgba ta katsuma cika, aku a gitai yi uwecishe maten-maten, "Mpa wa?"

<sup>20</sup> U wushunku le, "Uza u te da gai a asuvu a Kupanamere, uza da tsa lya kabolo a kapara ka te.

<sup>21</sup> Maku ma Vuma ma kuwa ta tyoku da a korongi ukuna u ne. Ter! Vuma da wa neke Maku ma Vuma mi, a'ari a matsa yi baci wa, wari u laka yi ta.”

*Yesu n atoni a ne a lyai ilikulya*

*(Matiyu 26:26-30; Luka 22:14-20; 1 Korintiya 11:23-25)*

<sup>22</sup> A'ari pini ulya ilikulya yi, Yesu bidyai burodi u cikpai Kashila, aku u jibamgbanasai u da. U nakai atoni a ne u danai, “Wushai na vi ikyamba i va i'ya.”

<sup>23</sup> U bidyai mako ma mini ma cinwi u cikpai Kashila. U naka le a soi.

<sup>24</sup> Aku u danai, “Naha vi mpasa n va n da n da a wotsongi a adama a ama ushani. Kashila ka yan ta manyan na mpasa n na mi tsara u yain kazuwamgbani ka savu n ama a ne. <sup>25</sup> Mayun da an bawu ma doku ma so mini ma cinwi she kain ka ma so ma savu a tsugono tsu Kashila.

<sup>26</sup> An a kotsoi ulya ilikulya yi, a shipai ushipa a cikpalai Kashila. Pini nala, a lazai ubana a Masasa ma Zayitum.

*Bituru wa nana ta Yesu*

*(Matiyu 26:31-35; Luka 22:31-34; Yahaya 13:36-38)*

<sup>27</sup> Yesu tonuko le, “Gba de ya suma ta i asaka mu, kpaci nala wari ukorongi a tagarada u Kashila, ‘Ma gala ta kaliniki ki, ncon mi kpam ma wacuwa ta.’”

<sup>28</sup> Shegai a 'yangasa mu baci, ma lasa da ta ubana a asuvu a Galili.”

---

◇ 14:27 Zak. 13:7.

29 Bituru tonuko yi, “Ko atoku a v̄a a suma baci gb̄a le, mpa ma suma wa.”

30 U danai, “Mayun n tonuko vu, n kayin ka na kahu kapen ka sala isali i ire, va nana mu t̄a vu dana vu reve mu wa hal kutatsu.”

31 Shegai Bituru lapulai u wushuki n ucira, “Ko wuna d̄a baci a ka wuna mu kabolo n avu, ma nana an n reve vu wa.” Gb̄a le dem nala a dansai.

*Yesu yain kvasu a Getisimani  
(Matiyu 26:36-46; Luka 22:39-46)*

32 A rawai a asu u d̄a w̄ari n̄a ndanga n zayitum asu u d̄a a ka isa Getisimani. Yesu tonukoi atoni a ne, “Dusuki ve pini na hal n ba n yain kvasu.”

33 Aku u bidyai Bituru n Yakubu n Yahaya. Kpam u git̄a d̄e upana ikyamba cika n kadambula ushani.

34 Aku u tonuko le, “Uma u v̄a wa pana t̄a ikyamba cika, yavu ma kuw̄a. Rongoi na n afōbi.”

35 An u lyai kapala kenu, aku u kud̄angi u varai kaci a iyamba u yain kvasu, ko wa yan a takpa yi ulapa u uwule vi.

36 Aku u danai, “Tata, ili dem i uyan i'ya ara vunu. Takpa mu mako ma m̄b̄al̄a mi. Ko n nala ukuna u v̄a u d̄a a ka tono wa, she u vunu.”

37 Aku u gonoi a asu u atoni a ne yi u cina le n a lavuti. U tonukoi Bituru, “Bituru alavu a d̄a v̄ari? Va fud̄a va rongo n vu wundi ulapa u uwule u te wa?”

38 Rongoi n afōbi n kvasu, kotsu i tuw̄a i rukp̄a a asuvu a ukondo wa. Kulu ku d̄e ku ciga t̄a ku yain ili i'ya i gain, shegai ikyamba i'̄a n ucira wa.”

39 Aku u doku u gonoi uyan kvasu, u rongoi utonusuko kadyanshi ka baci ki.

40 An u gonoi u doku u cina le alavu, kpaci alavu a shadangu le de a'eshi cika, ele tani a nambai ili i'ya a ka tonuko yi.

41 An u gonoi u tatsu, u wece le, “Hal n gogo-na alavu a da i buwai n i wunvugusi? U ratsa ta nala ulapa u uwule u yan de. A neke de Maku ma Vuma a akere a aza a unyushi u cingi.

42 'Yangai tsu walai. Kaneki ka va ka la ka tuwa.”

### *A kanai Yesu*

*(Matiyu 26:47-56; Luka 22:47-53; Yahaya 18:3-12)*

43 U kimba gbam unā wa, aku a wenei Yahuza uza u te a asuvu a Kupanamere yi, n kakuma ka ama, n iburundu na mkpaukpau a akere a le. Adaraki a pige n awenishiki a Mele na nkoshi a lya a tutsuku le.

44 Kaneki ki ka sheshike le ta kahu a tuwa, u danai, “Uza da baci n wambatsai, aya, i kana yi, i laza n eyi.”

45 N urawa u ne, u banai ara Yesu u danai, “Kawenishiki.” Aku u wofo yi.

46 Ele tani a kana yi.

47 Shegai uza u te a asuvu aza da a'ari kushani ki, u talai burundu u ne, aku u kapamgbanai kutsuvu ku kagbashi ka Magono ma Adaraki u takpamgbanai ka.

48 Yesu wece le, “Tuwa da i tuwai n iburundu na mkpaukpau i kana mu, yavu uza u magalaka?”

49 Kain dem ma ta kabolo n ada a Kuwa ku Kashila na n wenishiki, kpam i kana mu wa. Shegai yan da a yain nala tsara a shadangu udani u tagarada u Kashila.”

50 Pini nala, atoni a ne a sumai a asaka yi.

<sup>51</sup> Kalobo ka roku kpam n kunya ku uwambana ku ne koshi, u tono yi. An a zaṛai kotsu a kaṇa yi,  
<sup>52</sup> u aṣanka le kunya ki, u sumai kataḅa.

*Yesu a kapala ka Asheshi a Pige*

(*Matiyu 26:57-68; Luka 22:54-71; Yahaya 18:13-24*)

<sup>53</sup> Pini nala, a bankai Yesu a asu u Magono ma Adaraki. Gba adaraki a pige na nkoshi n awenishiki a Mele a bolomgbonoi ara ne. <sup>54</sup> Bituru tani wa tono yi mbari mbari, hal she a ulanga u kuwa ku Magono ma Adaraki mi. U dusuki a asuvu adagari a Kuwa ku Kashila ki, wa lyashuku akina.

<sup>55</sup> Adaraki a pige gba n Asheshi a Pige a boloi unyushi a kaci ka Yesu, kotsu a wuna yi. Shegai a tsara wa.

<sup>56</sup> Ama ushani a shamkpai kadyanshi ka kaḅan a kaci ka ne, shegai unā u le u tuwā u te wa.

<sup>57</sup> Aza roku kpam a 'yangai a shamkpai kadyanshi ka kaḅan a danai,

<sup>58</sup> “Tsu panaka yi ta u danai wa wasa ta Kuwa ku Kashila ka ama a mai, aku u mai ku roku a asuvu a a'ayin a tatsu. Kpam kuma ku uza ka wa.”

<sup>59</sup> Gba n nala ushamkpa u kaḅan u le u tonomgbono wa.

<sup>60</sup> Magono ma Adaraki ma shamgbai a mere ma le, u wece yi, “Va n ili i'ya va wushuku a kaci ka kadyanshi ka ama a ka tukuso a kaci ka vunu wa? Pada da va pada bini?”

<sup>61</sup> Shegai u padai ili i ne, u wushuku ko i te wa. Aku Magono ma Adaraki ma doku ma wece yi, “Ada Kirisiti Maku ma Kashila Uza u Tsupige vi?”

62 U wushuki u danai, “Mpa. Ya wene ta Maku ma Vuma ndishi a ulyaki u Kashila Uza u Ucira Gba, kpam i wene yi utuwa a asuvu a alishi.”

63 Aku Magono ma Adarakpi ma karasai aminya a ne, u danai, “Iryoci i eni i'ya kpam tsa bolo?”

64 I pana ta gai u yankai Kashila kadyanshi ka cingi. Nda i wenei?”

Gba le a wushuki, “U nusa ta, a wuna yi.”

65 Aza roku gbam a laza a gita yi ucikpusuka atatsa. A sira yi a'eshi a sugbasa yi n a tonusuki yi, “Tonuko tsu ili i'ya ya gita. Ya sugba vu.” Adagari a Kuwa ku Kashila tani a rongo yi ubasasa.

*Bituru nanai an u revei Yesu  
(Matiyu 26:69-75; Luka 22:56-62; Yahaya 18:15-27)*

66 Bituru wari a iyamba a ulanga u kuwa vi, kagbashi ka kari makere ka Magono ma Adarakpi ka tuwai.

67 An u wenei Bituru wa lyashuku a akina aku u vara yi a'eshi, u danai, “Avu dem kaɓolo ka wari n Yesu uza u Nazara nala vi!”

68 U nanai u danai, “Mpa n reve gbam i'ya va tonowa.” Aku u wutai a kefile ki, kute-kute kapen ka salai.

69 An kagbashi ka kari makere mi u wene yi pini, aku u tonukoi aza da a'ari pini a asu vi kushani, “Eyi na dem uza u le u da.”

70 Aku u doku u nanai kpam.

An a barakpai kenu, aza da a'ari kushani a tonukoi Bituru, “Malala ma la wa, avu dem uza u te u da a asuvu a le, kpaci avu uza u Galili u da.”



<sup>71</sup> Aku u kaṅai uyansaḱa kaci ka ne unā n u tsinaṣi n u dansi, “N reve ve gbam vuma ḁa ya dansaḱa vi wa.”

<sup>72</sup> Kute-kute, kapen ka salai isali i ire. Aku Bituru ciḁai kadyanshi ka Yesu tonuko yi, “Kahu kapen ka sala isali i ire, va nana mu ta vu dana vu reve mu wa hal kutatsu.” An u ciḁai nala, aku u taṣai n kushen.

## 15

### *A bankai Yesu ara Bilatu*

(*Matiyu 27:1-2, 4; Luka 23:1-5; Yahaya 18:28-38*)

<sup>1</sup> Kain n ka wansi n kpasani ku de, adaraḱpi a pige na nkoshi n awenishiki a Mele n Asheshi a Pige gba a sheshei, aku a sirai Yesu a lazai n eyi ubana ara Bilatu gomuna.

<sup>2</sup> An a rawai, Bilatu wece yi, “Avu magono ma aza a Yahuda ma?”

U wushunki yi u danai, “Nala wari tyoku ḁa vu danai vi.”

<sup>3</sup> Adaraḱpi a pige a lyai kapala n utonusuko Bilatu ukuna u Yesu.

<sup>4</sup> U doku u wece yi, “Va n ili i uwushuku wa, vu pana gbam ili i'ya ama a na a'ari utono a kaci ka vunu?”

<sup>5</sup> Shegai Yesu doku u dana ili wa. Bilatu wenei nala, hal u yain majiyan.

### *A kidagai Yesu ugana u ukpa*

(*Matiyu 27:15-26; Luka 23:13-25; Yahaya 18:39-19:16*)

<sup>6</sup> Kayen dem a a'ayin a Abiki a Upasamgbana, Bilatu cuwanaḱa ta u asaṅka le vuma u te u ḁa ama

a foloi u aṣankā le a asuvu ama ḁa a ukai a kuwa ku a'ali.

<sup>7</sup> Vuma roku ḁa pini uza u kala Baraba. Wā tā usiri adama a u'yangāsasa atakasuvu a ama kaḁolo n atoku a ne aza ḁa a wunai ama, a kain ka a 'yangāsai atakasuvu a ama.

<sup>8</sup> Ama a banai ara Bilatu a folo yi u yanka le ili i'ya u cuwanakai.

<sup>9</sup> U wushunku le u danai, “Gogo-na ciga ḁa ya ciga n aṣankā ḁa magono ma aza a Yahuda mi?”

<sup>10</sup> Kpaci u reve tā adama a malyon a ḁa aḁarakpi a pige a bankai Yesu ara ne.

<sup>11</sup> Aḁarakpi a pige a maṣai ama a dana a wutumkpa le Baraba.

<sup>12</sup> Aku Bilatu danai, “Nɔya ma yan n uza ḁa ya isa magono ma aza a Yahuda mi?”

<sup>13</sup> Ama a worukpoi a danai, “A wandamgbana yi.”

<sup>14</sup> U wece le, “Adama a iyen, ili i cingi i eni i'ya u yain?”

Shegai ama yi a lapulai a worukpoi, a danai, “A wandamgbana yi.”

<sup>15</sup> An Bilatu wa ciga ama a pana kayanyan ka ne, aku u wutumkpa le Baraba. U zuwai a bawain Yesu, aku u naka le a ba a wandamgbana yi.

*Asoje a yankai Yesu majari  
(Matiyu 27:27-31; Yahaya 19:2-3)*

<sup>16</sup> Asoje a banai n Yesu a asuvu a keḁile ku tsugono, aku a ɓolomgbonoi gba kakuma ka asoje.

<sup>17</sup> A ukunka yi aminya a ngono a mini ma galura. Aku a yain funi u awana, a zuwuka yi u

ɗa a kaci. <sup>18</sup> A gita yi idyani, “Uzapige, uzapige, magono ma aza a Yahuda.”

<sup>19</sup> A rongo yi ukudusa a kaci n kalangu, n a cikpusuki yi atatsa. Aku a kudangi a da a ka naka yi tsupige.

<sup>20</sup> An a kotso yi uyanka majari, a mondo yi aminya a ngono yi. A uka yi aminya a ne. Pini nala, a wutukpa yi a kateshe, kotsu a wandamgbana yi.

### *A wandamgbanaɗi Yesu*

*(Matiyu 27:32-44; Luka 23:26-43; Yahaya 19:17-27)*

<sup>21</sup> Vuma roku ɗa pini uza u kala Simo uza u Sirani, tata u Alizanda n Rafu, u wutai a une wa wura. Asoje a shamkpa yi a matsa yi u canga mawandamgbani ma Yesu.

<sup>22</sup> A bankai Yesu a asu u ɗa a ka isa Golugota;† (wata, Asu u Mako ma Kaci).

<sup>23</sup> A naka yi mini ma cinwi kaɓolo n aguma a ɗa a ka isa mar, shegai u 'yuwain ma uso.

<sup>24</sup> Aku a wandamgbana yi. A pecishei aminya a ne utyoku u le. A varangi uruta, tsara a wene ili i'ya ya dem wa tsara.

<sup>25</sup> N ulapa uwule u kuci u usana u ɗa a wandamgbana yi.

<sup>26</sup> Uza ɗa baci a wandamgbanaɗi, a tsu korongu ta unyushi u ne zuba n kaci ka ne. Ili i'ya a koronki Yesu i'ya na: MAGONO MA AZA A YAHUDA.

<sup>27</sup> A wandamgbanaɗi kpam dem aza a magalaka ama a re. Uza u te a ulyaki u ne, uza u te tani a ugula. [

28 Nala a shadangi udani u da u danai, “A kece yi a asuvu a aza a unyushi.”]\*

29 Aza da a ka wurusa, a rongo yi uyansaƙa kadyanshi ka gbani, n a gbaɗi a'aci a le. “Mhm! Avu uza da vu da va waṣa Kuwa ku Kashila, aku vu mai ka a asuvu a'ayin a tatsu.

30 Cipa wawa! Vu wauwa kaci ka vunu.”

31 Nala tani kpam dem adarakpi a pige n awenishiki a Mele a rongo yi uyanka majari. A danai, “U wauwai aza roku, shegai u fuda u wauwa kaci ka ne wa.

32 Kawauwi ka na ki, magono ma aza a Isara'ila, u cipa pini a mawandamgbani mi tsu wene wawa tsara tsu pityanangu n eyi.”

Hal n aza a magalaka a da a wandamgbanai kabolo n eyi dem a yanka yi kadyanshi ka gbani.

### *Ukpa u Yesu*

*(Matiyu 27:45-56; Luka 23:44-49; Yahaya 19:28-*

*30)*

33 N kaara a kaci, aku uyamba vi gba u likpamgbanaɗi n karimbi hal ubana ulapa uwule u tatsu.

34 N ulapa uwule u tatsu vi, Yesu salai, “Eloyi, Eloyi, lama sabakataɗi.” (Wata, “Kashila ka va, Kashila ka va, ndya i zuwai vu varangu mu?”)

35 An ama da a'ari pini kushani a panai nala, a danai, “Panai, wa isa Iliya.”

36 Aku vuma u te u sumai u ba u reki kashaku n mini ma kalam, u sapai ka a kalangu, u sakunki yi kotsu u soi. Aku u danai, “Asakaɗi tsu wene ko Iliya wa tuwa u cipuka yi.”

\* 15:28 Akorongi a cau ushani aza da a purai a tagarada u Marku a kalatsa ta makpanda ma 28.

<sup>37</sup> Yesu salai cika, aku u uma u ne u wutai.

<sup>38</sup> Kute-kute kunya ka a barakpai a asuvu a Kuwa ku Kashila ki ku pecembenei kure. Ili i'ya i kana i zuba hal ubana a iyamba. <sup>39</sup> An katigi ka ka shamgbai ka wundya Yesu, u wenei tyoku da u kuwai. U danai, "Mayun vuma u naha vi, Maku ma Kashila ma."

<sup>40</sup> Aka a roku a da pini a shamgbai a ka yan akalu a mbari. A asuvu a le alya Meri Magadaliya, n Solomi, n Meri (mma u Yakubu u kenu n Isuhu).

<sup>41</sup> Alya a tonoyi, tun a Galili n a yanki yi manyan. N aka a da a tuwai kabolo n eyi a Urishelima alya dem pini.

### *Kacida ka Yesu*

*(Matiyu 27:57-61; Luka 23:50-56; Yahaya 19:38-42)*

<sup>42</sup> Gba ukuna u na vi u gita ta a Kain ka Afofi; wata, kain ka wansa baci aku Ashibi. An kuvuli ka yan,

<sup>43</sup> aku Isuhu u Arimatiya u ghamai asuvu u banai ara Bilatu, u folo yi u naka yi ikyamba i Yesu u cidangu. (Isuhu vuma da uza da a ka pana n eyi a asuvu a Asheshi a Pige yi, uza da wa vana utuwa u tsugono tsu Kashila tsu rawa.)

<sup>44</sup> Bilatu yan ta majiyan an u panai a da Yesu kuwa de. U isa katigi ka ka wundya Yesu vi. Aku u wece yi ko u barakpa de n ukpa.

<sup>45</sup> An katigi ki ka tonuko yi u kuwa de, aku u nakai Isuhu ikyamba yi.

<sup>46</sup> Pini nala, u ba u tsilai kunya, aku u katalai pini ikyamba yi, u ba u ukai i'ya a kasaun ka a sadarai a katali. An u kotsoi, aku u gindalakpai katali ka pige u kimbai utsutsu u kasaun vi.

<sup>47</sup> Meri Magadaliya n Meri mma u Isuhu a wene t̄a a asu u ḁa a cid̄angi ikyamba i Yesu yi.

## 16

*U'yanḡa u Yesu a ukpa*

*(Matiyu 28:1-8; Luka 24:1-12; Yahaya 20:1-10)*

<sup>1</sup> An Ashibi a wurai, Meri Magadaliya, n Meri mma u Yakubu, n Solomi a tsilai ucanga u magulani, kotsu a ba a tsunku ikyamba i Yesu.

<sup>2-3</sup> N kpasani ku kain ka kagit̄a ka a a'ayin a shindere a kaṅai ure. Ele a nwalu a ka yawunsa uza ḁa wa ba u gindal̄akpuka le katali ka a kimbugai utsutsu u kasaun vi. Kaara n ka ḁatsi ele n a rawi pini a utsutsu u kasaun vi.

<sup>4</sup> A webelei na a wenei katali ki a gindal̄akpa ka ḁe, ka la a ikengi ka pige ka tani.

<sup>5</sup> An a uwai a wenei kalobo ka roku n aminya a eri ndishi a ulyaki, aku uwonvo u kaṅa le.

<sup>6</sup> Pini nala, kalobo ki ka tonuko le, “Panai uwonvo wa. N reve t̄a Yesu uza u Nazara, uza ḁa a wandamgbanai vi aya ya bolo. Webelei asu u ḁa a'ari a zuwai ikyamba i ne ḁa na, wa kpm pini wa, u 'yanḡa ḁe.

<sup>7</sup> Walai i ba i tonuko Bituru n atoni a ne a ḁa a buwai, i tonuko le wa lasa ḁa t̄a ubana a uyamba u Galili. Nte ya ba i wene yi ḁe tyoku ḁa u tonuko ḁa a'ayin a ḁa wari n aḁa.”

<sup>8</sup> Aku a wutai a wuranai n ilyadi ikyamba n i jeyi, kpm alya la ulapani a dana uza ukuna wa adama a uwonvo.

*Meri Magadaliya wenei Yesu*

<sup>9</sup> [N kpasani ku kain ka kagit̄a ka a'ayin a shindere ka Yesu 'yanḡai. Vuma ḁa u git̄a yi uwene,

Meri Magadaliya ɗa, uka ɗa u wutukpaɪ ityoni i cingi i shindere ara ne.

<sup>10</sup> U ba u tonukoi atoni a Yesu, u cina le atsuma unamgbi n a sayi.

<sup>11</sup> Shegai an u tonuko le Yesu 'yanga ɗe, hal gbam u wene yi ta, a 'yuwain uwushuku.

*Yesu wenikei kaci ka a asu u atoni a re  
(Luka 24:13-35)*

<sup>12</sup> Yesu yansaƙai tyoku u roku, aku u asaƙai atoni a ne ama a re aza ɗa a ka bana a ilyuci a wene yi.

<sup>13</sup> Aku a gonoi a ba a tonukoi atoku a le. Atoku yi a 'yuwain uwushuku n ili a danai.

*Yesu asaƙai kupa n uza u te vi a wene yi  
(Matiyu 28:16-20; Luka 24:36-49; Yahaya 20:19-23; Asuki 1:6-8)*

<sup>14</sup> Pini nala, u asaƙai atoni a ne kupa n uza u te vi a wene yi, a'ayin a ɗa a ka lya ilikulya. Aku u ɓongo le adama a ugbama u asuvu a le n ukpaɗa u uwushuku n ili i'ya ama ɗa a wene yi a tonuko le.

<sup>15</sup> Aku u tonuko le, “Walai i bana a asuvu a likimba i yanka ama Kadyanshi ka Shinga ka va.

<sup>16</sup> Gba uza ɗa baci dem u wushuki n kadyanshi ki hal a lyuɓugi yi, a ka wauwa yi ta. Kpam uza ɗa baci u 'yuwain ka, a ka varangu yi ta.

<sup>17</sup> Iryoci i na ya tonu ta aza ɗa a wushuki: asuvu a kala ka va a ka wutukpa ta ityoni i cingi a asuvu a ama. A ka yan ta dem kadyanshi n aletsu a roku.

<sup>18</sup> A ka bidya ta a'ali n akere a le, kpam a ka yanka le ili wa. Uza u so baci tsukonu, tsa tsa yan yi ili wa ko kenu. Kpam a ka sawa ta aza a mɓala a taɗasa le.”

*A cangai Yesu ubana a zuba*  
(Luka 24:50-53; Asuki 1:9-11)

<sup>19</sup> An Yesu kotso le uyanka kadyanshi, aku a canga yi ubana a zuba. U ba u dusuki a kukere ku ulyaki ku Kashila. <sup>20</sup> Atoni a ne tani a lazai, a rongoi uyan kuɓari ku Kadyanshi ka Shinga ka Kashila, ko nte wa a asuvu a likimba. Asheku n a ɓanga le asu u ɗa u asaka le a ka yansa ikunesavu n i weniki kadyanshi ki mayun ɗa.]



**Kazuwamgbani ka savu n Tsikimba n a6on a  
da a dangasai a kazuwamgbani ka cau  
New Testament in Tsikimba (NI:kdl:Tsikimba)**

copyright © 2010 Wycliffe Bible Translators, Inc.

Language: Tsikimba

Translation by: Wycliffe Bible Translators, Inc.

**Copyright Information**

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Tsikimba

**© 2010, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

---

PDF generated using Haiola and XeLaTeX on 18 Apr 2025 from source files  
dated 29 Jan 2022

a4f6a28b-3d6d-50b4-a81b-06ae05a66010